

MESYUARAT KEDUA, PENGGAL KETIGA
PARLIMEN KEEMPAT BELAS
2020

HARI SELASA : 18 OGOS 2020

JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 11 HINGGA NO. 50)

**PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : DATO' SERI HAJI IDRIS BIN JUSOH [BESUT]

TARIKH : 18 OGOS 2020 (SELASA)

SOALAN

minta **MENTERI PENGAJIAN TINGGI** menyatakan kedudukan terkini ranking Universiti-Universiti Awam (UA) menerusi penarafan "*QS World University Rankings*" dan "*Times Higher Education*".

JAWAPAN

Tuan Yang di-Pertua,

Berdasarkan laporan *QS World University Rankings* 2021 (QS-WUR 2020) yang dikeluarkan pada 10 Jun 2020, Universiti Malaya (UM) telah berjaya disenaraikan di antara **59 universiti terbaik di dunia** berbanding di tempat ke-70 pada tahun lepas. Buat julung-julung kalinya juga, UM bersama empat (4) buah Universiti Penyelidikan Malaysia yang lain juga berjaya menunjukkan peningkatan yang membanggakan dan telah disenaraikan dalam **kelompok 200 terbaik dunia** buat kali pertama dan *Top 1% in the World* iaitu Universiti Putra Malaysia (UPM) di kedudukan ke-132 (2020: 159), Universiti Kebangsaan Malaysia (UKM) di kedudukan ke-141 (2020: 160), Universiti Sains Malaysia (USM) di kedudukan ke-142 (2020: 165) dan diikuti oleh Universiti Teknologi Malaysia (UTM) di kedudukan ke-187 (2020: 217). Selain itu, sebanyak tujuh (7) universiti awam juga berjaya disenaraikan di dalam senarai 'top 1000' *QS World University Rankings* 2021 iaitu UUM, UIAM, UiTM, UMP, UNIMAS, UniMAP dan UMS.

Untuk makluman juga, berdasarkan laporan *Times Higher Education World University Rankings 2020* (THE-WUR 2020) yang dikeluarkan pada 11 September 2019, Universiti Malaya kekal di kedudukan ke-301-350; THE-WUR 2020 (2019: 301-350). Lima (5) buah Universiti Awam Malaysia yang lain pula berada di kedudukan yang sama iaitu ke-601-800; THE-WUR 2020 (2019: 601-800) iaitu Universiti Kebangsaan Malaysia, Universiti Malaysia Perlis, Universiti Putra Malaysia, Universiti Sains Malaysia dan Universiti Teknologi Malaysia. Selain itu, Universiti Utara Malaysia turut mengekalkan kedudukan ke-801-1000; THE-WUR 2020 berbanding tahun sebelum (2019: 801-1000). Universiti Malaysia Sarawak dan Universiti Teknologi MARA pula juga mengekal di kedudukan yang sama iaitu ke-1001+; THE-WUR 2020 (2019: 1001+).

Kejayaan ini merupakan kejayaan terbaik negara setakat ini dan membuktikan bahawa halatuju Pendidikan Tinggi Negara berada di atas landasan yang betul dalam menyediakan institusi pendidikan tinggi yang berkualiti dan cemerlang sejajar dengan Pelan Pembangunan Pendidikan Malaysia, 2015-2025 (Pendidikan Tinggi) (PPMPT). Melalui Pelan ini, Kementerian mensasarkan sebuah universiti berada dalam *Asia's Top 25*, dua (2) dalam *Global Top 100* dan empat (4) dalam *Global Top 200*. Dari segi kualiti keseluruhan sistem pula, Kementerian mensasarkan peningkatan dari penghasilan penyelidikan dalam U21 dari kedudukan ke-36 (tahun 2015) ke kedudukan 25 (menjelang tahun 2025) daripada 50 buah negara.

Kejayaan ini secara tidak langsung akan terus menempatkan Malaysia sebagai hub pendidikan tinggi di rantau ini. Di samping itu, ianya juga dapat membantu institusi dalam menjalinkan kerjasama dengan penyelidik terkemuka dunia.

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN NOR AZRINA BINTI SURIP
[MERBOK]**

TARIKH : 18 OGOS 2020 (SELASA)

SOALAN

**Puan Nor Azrina binti Surip [Merbok] minta MENTERI
PEMBANGUNAN WANITA, KELUARGA DAN MASYARAKAT
menyatakan secara terperinci perkembangan terkini berkenaan
penggubalan Rang Undang-Undang (RUU) Gangguan Seksual.**

JAWAPAN

Tuan Yang di-Pertua,

Draf RUU GS telah disediakan oleh Kementerian Pembangunan Wanita, Keluarga dan Masyarakat (KPWKM) dengan mengambil kira pandangan pelbagai pihak melalui penubuhan satu pasukan projek khas yang terdiri daripada pihak berkepentingan meliputi pelbagai Kementerian dan Agensi, ahli akademik, Pertubuhan Bukan Kerajaan (NGO) dan individu-individu yang mempunyai pengalaman dan pengetahuan berkenaan isu-isu spesifik berkaitan gangguan seksual. Penglibatan dan konsultasi dengan pelbagai pihak ini telah banyak membantu dalam mempercepatkan lagi proses penyediaan draf RUU tersebut.

Draf RUU ini telah dikemukakan ke Jabatan Peguam Negara pada 23 Januari 2020 untuk pemakluman pihak mereka. Sebagai tindakan susulan, KPWKM pada 7 Februari 2020 telah mengadakan satu mesyuarat yang melibatkan Jabatan Peguam Negara, BHEUU, Pejabat Ketua Pendaftar Mahkamah Persekutuan dan ahli-ahli pasukan khas yang membantu menggubal RUU ini. Melalui mesyuarat tersebut, pihak Jabatan Peguam Negara telah mengemukakan pandangan dan cadangan penambahbaikan pada draf RUU GS dan pada masa kini ia sedang di fasa akhir penyediaan dan pengemaskinian oleh KPWKM.

Berdasarkan perancangan asal, RUU ini dicadangkan untuk dibentangkan di Parlimen sekitar bulan Mac 2020. Namun demikian, mengambil kira perubahan struktur Kerajaan terkini, cadangan penggubalan RUU ini perlu dibentangkan semula kepada Jemaah Menteri untuk pertimbangan dan keputusan Kerajaan semasa. Selain itu, beberapa perubahan juga perlu dibuat ke atas perancangan asal penggubalan RUU ini berikutan Perintah Kawalan Pergerakan yang dilaksanakan oleh Kerajaan dalam menangani pandemik COVID-19.

Kementerian merancang untuk membentangkan bacaan pertama kedua-dua RUU GS dalam Mesyuarat Ketiga Penggal Ketiga Parlimen Keempat Belas tahun 2020 yang dijangka pada hujung tahun ini.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATO' HASBULLAH BIN OSMAN [GERIK]

TARIKH : 18 OGOS 2020 (SELASA)

SOALAN

Minta **MENTERI PENDIDIKAN** menyatakan apakah status terkini mengenai perlaksanaan pengajaran dan pembelajaran subjek Sains dan Matematik dalam Bahasa Inggeris di sekolah.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia tidak berhasrat untuk memperkenalkan semula dasar Pengajaran dan Pembelajaran Sains dan Matematik dalam Bahasa Inggeris (PPSMI).

Di bawah Dasar Memartabatkan Bahasa Malaysia Memperkukuh Bahasa Inggeris (MBMMBI), *Dual Language Programme* (DLP) telah diperkenalkan mulai pada tahun 2016 dengan memberi pilihan kepada pihak sekolah untuk melaksanakan pengajaran dan pembelajaran bagi mata pelajaran bidang Sains dan Matematik dalam bahasa Inggeris.

Program rintis DLP telah dilaksanakan pada tahun 2016 yang melibatkan 377 buah sekolah, iaitu 132 buah sekolah rendah dan 245 buah sekolah menengah. Setelah empat tahun pelaksanaan program DLP ini, jumlah sekolah yang terlibat telah meningkat kepada 2,291 buah sekolah pada tahun 2020, iaitu 737 buah sekolah rendah dan 1,554 buah sekolah menengah.

KPM juga dalam usaha menambah baik pendidikan bahasa Inggeris bagi meningkatkan penguasaan bahasa Inggeris guru dan murid untuk keperluan pada masa akan datang, dan KPM telah melaksana dan merancang pelbagai program pengukuhan bahasa Inggeris.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 18 OGOS 2020 (SELASA)

SOALAN

minta **MENTERI PENGAJIAN TINGGI** menyatakan apakah rancangan pihak Kementerian untuk memulakan pendidikan percuma di Universiti Awam (UA) bagi golongan orang kurang upaya (OKU) dan golongan asnaf. Bagaimanakah dengan perancangan ini membolehkan pihak Kementerian memperluaskan pendidikan percuma di UA kepada golongan B40 dan kemudiannya kepada semua penuntut yang lain.

JAWAPAN

Tuan Yang di-Pertua,

Untuk makluman Ahli Yang Berhormat, KPT amat prihatin dengan bebanan kewangan yang ditanggung oleh pelajar terutama kemampuan membayar yuran pengajian oleh pelajar OKU dan pelajar dari golongan B40 khususnya golongan asnaf. Yuran pengajian yang perlu dibayar oleh para pelajar di Universiti Awam (UA) adalah sekitar 10% sahaja daripada kos sebenar bidang pengajian tersebut mengikut harga yuran pasaran, manakala baki 90% lagi kos pengajian telahpun disubsidi oleh kerajaan melalui peruntukan kewangan tahunan. Oleh yang demikian, kos pengajian di UA boleh dikatakan hampir percuma dengan pemberian 90% subsidi tersebut.

Bagi memastikan kebajikan pelajar OKU dan pelajar dari golongan B40 terjaga dan tidak dibebankan dengan isu kewangan, kerajaan melalui pelbagai agensi menyediakan pembiayaan sama ada pinjaman pendidikan atau biasiswa kepada pelajar yang layak. Selain itu, pihak UA telah mengambil langkah proaktif dengan menyediakan bantuan kewangan di peringkat UA masing-masing. Terkini, terdapat UA seperti Universiti Putra Malaysia (UPM), Universiti Utara Malaysia (UUM), Universiti Sains Malaysia (USM), Universiti Kebangsaan Malaysia (UKM) dan Universiti Teknologi MARA (UiTM) yang telah menjadikan zakat sebagai sumber pembiayaan kepada pelajar dari golongan OKU dan asnaf. Pelajar-pelajar ini akan dibantu menerusi pembiayaan yuran pengajian, elaun sara hidup atau elaun-elaun lain yang bersesuaian dengan keperluan dan kemampuan kewangan UA tersebut.

Pelajar OKU dan B40 ini turut mendapat manfaat dari segi penyediaan laluan khas mereka ke UA. Mereka hanya perlu memenuhi syarat minimum bagi semua program untuk mendapatkan tempat di UA.

Dari segi pembiayaan pengajian bagi OKU pula, Bahagian Biasiswa KPT telah memperuntukkan bantuan kewangan bagi pelajar sepenuh masa. Bantuan ini meliputi wang saku dan yuran pengajian yang kedua-duanya tidak melebihi RM5,000/setahun atau RM20,000 sepanjang tempoh pengajian pada satu peringkat pengajian.

Sekiranya pelajar OKU tersebut merupakan penerima biasiswa, mereka layak menerima wang saku RM300/sebulan dan bakinya adalah bantuan yuran tertakluk kepada RM5,000 setahun bagi kedua-dua elemen berkenaan. Elaun khas ini tidak mengambil kira taraf pendapatan sebagai syarat kelayakan. Sesungguhnya bantuan yang diberikan kepada pelajar OKU adalah bertujuan untuk meningkatkan kemahiran dan pengetahuan mereka agar dapat berdikari.

Sekian, terima kasih

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN SABRI BIN AZIT [JERAI]

TARIKH : 18 OGOS 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan bentuk bantuan dan jumlah insentif yang diperolehi oleh para nelayan, petani dan penternak dalam PENJANA bagi menghadapi wabak COVID-19.

JAWAPAN

Tuan Yang Dipertua,

Kementerian Pertanian dan Industri Makanan (MAFI) melalui Pelan Jana Semula Ekonomi (PENJANA) yang diumumkan pada 5 Jun 2020 telah memperuntukkan RM400 juta untuk melaksanakan tiga (3) inisiatif bagi menghadapi wabak COVID-19:

- a) Skim Pembiayaan Mikro Kredit yang menawarkan pinjaman dengan kadar faedah 3.5% untuk tempoh 5 tahun;
- b) Program Kebuniti / Pertanian Bandar berbentuk pemberian *in-kind* sebanyak RM500 untuk individu dan RM50,000 untuk komuniti; dan
- c) Program Mobiliti Tenaga Kerja Agromakanan yang menawarkan insentif penggajian kepada syarikat yang menyediakan latihan semula dalam industri agromakanan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATO' SERI UTAMA HAJI MUKHRIZ
BIN TUN DR. MAHATHIR [JERLUN]**

TARIKH : 18 OGOS 2020 (SELASA)

SOALAN

**YB DATO' SERI UTAMA HAJI MUKHRIZ BIN TUN DR. MAHATHIR
[JERLUN]** minta **MENTERI KOMUNIKASI DAN MULTIMEDIA**
menyatakan jelaskan berkaitan perkara- perkara berikut:

- a) langkah banteras fitnah, tohmahan dan hasutan dalam pelbagai medium di media sosial; dan
- b) jumlah aduan dan kes yang diterima serta tindakan dan kaedah memantau penularan bahan-bahan berita palsu.

JAWAPAN

Tuan Yang di-Pertua,

a)

1. Untuk makluman Ahli Yang Berhormat, kaedah terbaik dalam memerangi maklumat berita palsu adalah dengan 'membanjiri' ruang maklumat dengan berita benar. Sehubungan dengan itu, Kementerian dan agensi-agensi dibawah Kementerian akan meneruskan inisiatif kesedaran serta pengupayaan dan pendidikan pengguna atau "*user empowerment and education*" melalui pelbagai program advokasi dan kesedaran di media dan di lapangan. Gerak kerja inisiatif advokasi dan kesedaran adalah komitmen Kementerian untuk memupuk kesedaran

awam mengenai gejala berita palsu, membudayakan amalan menyemak dan menentukan kesahihan sesuatu berita sebelum dikongsi atau disebarkan, serta membudayakan amalan menyebarkan kebenaran.

2. Pada masa yang sama, kolaborasi dan kerjasama baik yang telah sedia terjalin dengan penyedia platform media sosial seperti *Facebook*, *Google* dan *Twitter* akan terus diperkukuh dan diperkasakan terutamanya dalam usaha menurun atau memadamkan kandungan yang menyalahi undang-undang Malaysia, selaras dengan norma-norma serta nilai budaya negara. Ini selari dengan terma perkhidmatan serta piawaian komuniti pihak penyedia platform-platform berkenaan.

3. Dalam aspek penguatkuasaan, “Jawatankuasa Jenayah Siber” yang telah ditubuhkan antara PDRM dan SKMM juga akan terus digerakkan dan diperkasakan bagi menyelaraskan tindakan penguatkuasaan di bawah Kanun Keseksaan dan Akta Komunikasi agar tindakan penguatkuasaan lebih strategik dan tersusun, dalam menangani kesalahan jenayah siber termasuklah yang berkaitan penyebaran kandungan, maklumat, berita atau laporan tidak benar atau palsu.

4. Menyedari kepentingan menangkis penularan berita palsu secara pantas dan tuntas, KKMM juga telah menubuhkan pasukan khas; Pasukan Respons Pantas (PRP) yang dianggotai oleh KKMM, Majlis Keselamatan Negara (MKN), SKMM dan Jabatan Penerangan Malaysia (JaPen) pada 24 Mac 2020 hasil cetusan ilham YB Menteri Komunikasi dan Multimedia, bagi menangani penyebaran berita palsu berkaitan COVID-19.

5. Secara dasarnya, PRP KKMM membuat pemantauan terhadap isu-isu berkaitan dakwaan jangkitan COVID-19 termasuk isu berkaitan Kementerian Kesihatan Malaysia (KKM), Perintah Kawalan Pergerakan (PKP), Perintah Kawalan Pergerakan Diperketatkan (PKPD), Perintah Kawalan Pergerakan Bersyarat (PKPB) dan Pakej Rangsangan Ekonomi Prihatin Rakyat (PRIHATIN). Ini kerana isu-isu yang dinyatakan menarik perhatian rakyat dan berpotensi memberi impak negatif menimbulkan keresahan dalam kalangan rakyat sekiranya tidak ditangani lebih awal

yang memungkinkan berlakunya insiden-insiden yang tidak diingini seperti *panic buying* dan rusuhan seperti yang berlaku di luar negara.

6. Prosedur Operasi Standard (SOP) PRP KKMM telah ditetapkan untuk mendapat pengesahan dan maklumbalas yang diperlukan daripada pihak berkaitan. Komunikasi dua hala antara PRP KKMM bersama pegawai kementerian / jabatan / agensi berkaitan bagi mendapatkan pengesahan kesahihan terhadap sesuatu isu kebiasaannya mengambil masa minimum selama 30 minit dan maksimum sehingga 3 jam. Sejurus memperoleh pengesahan bagi isu yang dikenalpasti, draf penafian berita palsu dikenali sebagai 'Pemakluman Berita Palsu' disediakan dalam kadar segera dan disiarkan mengikut waktu siaran yang ditetapkan. Bagaimanapun terdapat juga siaran khas bagi isu kritikal dan *ad hoc* sekiranya menerima arahan daripada Pejabat Perdana Menteri (PMO).

7. Sehingga 14 Ogos 2020, sebanyak 365 penafian berita palsu telah diperjelaskan kepada masyarakat.

b)

1. Antara tahun 2018 sehingga Julai 2020, sejumlah **121** kes telah disiasat oleh pihak SKMM berhubung penyebaran berita palsu, dan **7** daripadanya telah dihadapkan ke mahkamah dengan **10** pertuduhan. Usaha yang dijalankan SKMM ini akan diteruskan selaras laporan dan aduan awam yang diterima, terutamanya bila melibatkan berita palsu yang boleh menjejaskan keharmonian perhubungan antara berbilang kaum dan agama di dalam negara.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD JOHNIE BIN ZAWAWI [IGAN]

TARIKH : 18 OGOS 2020 (SELASA)

SOALAN

Minta **MENTERI PENDIDIKAN** menyatakan apakah status terkini pembinaan baru SMK Matu, Bahagian Mukah dan bilakah pembinaannya akan dimulakan serta kos sebenar yang terlibat.

JAWAPAN

Tuan Yang di-Pertua,

Untuk makluman Ahli Yang Berhormat, projek pembinaan Sekolah Menengah Kebangsaan Matu di Daro, Sarawak telah diluluskan dalam *Rolling Plan 2* (Tahun 2017), Rancangan Malaysia Ke-11 dengan kos sebanyak RM75 juta. Skop projek ini meliputi pembinaan gantian penuh bilik darjah, asrama dan kemudahan lain.

Pelaksanaan projek pembinaan sekolah ini dikendalikan sepenuhnya oleh Jabatan Kerja Raya (JKR) Sarawak. Sehingga 17 Ogos 2020, projek masih dalam fasa prabina, iaitu penyediaan lukisan terperinci dan dokumentasi tender. Pembinaan projek dijangka bermula pada tahun 2021 dengan kos masih dikekal sebanyak RM75 juta.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KEDUA , PENGKAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK MOHD. AZIS BIN JAMMAN
[SEPANGGAR]**

TARIKH : 18 OGOS 2020 (SELASA)

SOALAN

Minta **MENTERI TENAGA DAN SUMBER ASLI** menyatakan penjelasan berkenaan isu bil Tenaga Nasional Berhad yang melambung dengan melampau sehingga menimbulkan beban yang teruk kepada rakyat di seluruh negara.

JAWAPAN

Datuk Yang di-Pertua,

1. Terdapat beberapa faktor yang menyumbang kepada peningkatan bil elektrik di kalangan pengguna domestik sepanjang tempoh Perintah Kawalan Pergerakan (PKP). Antaranya adalah seperti berikut:

- (i) penggunaan elektrik di kalangan pengguna domestik sepanjang tempoh PKP telah meningkat di antara 20 hingga 50%. Keadaan ini berlaku kerana rakyat telah mematuhi perintah Kerajaan untuk berada di rumah masing-masing dan tidak keluar rumah sepanjang tempoh PKP kecuali pekerja-pekerja dalam sektor-sektor yang menyediakan perkhidmatan penting kepada rakyat; dan

- (ii) operasi bacaan meter elektrik secara fizikal telah dihentikan sepanjang tempoh PKP iaitu bagi tempoh 20 Mac 2020 sehingga 18 Mei 2020. Bacaan bil dibuat secara anggaran bagi tempoh Mac, April dan Mei 2020 yang menyebabkan bil elektrik bulan Jun kelihatan tinggi kerana penyelarasan dibuat bagi bil anggaran bulan Mac, April dan Mei di dalam bil bulan Jun. Aktiviti bacaan meter elektrik oleh semua utiliti elektrik di Malaysia telah dihentikan secara sementara bermula 18 Mac 2020 mengikut Prosedur Operasi Standard (SOP) PKP yang ditetapkan oleh Majlis Keselamatan Negara (MKN) demi menjaga kebajikan pembaca meter dan memutuskan rantai serta membendung penularan wabak Covid-19. Langkah yang sama juga telah diambil oleh pihak utiliti lain di rantau ini seperti Singapura, Filipina, Thailand dan Indonesia.

2. Memang tidak dinafikan bahawa pembacaan bil secara anggaran ini telah menimbulkan kekeliruan di kalangan pengguna memandangkan ini merupakan kali pertama TNB melaksanakan pengebilan secara anggaran untuk tempoh 3 bulan berturut-turut. Tambahan pula, kaedah pengiraan ini agak sukar difahami oleh sebahagian besar rakyat yang menyebabkan timbulnya ketidakpuasan hati dan seterusnya menyebabkan isu peningkatan bil secara mendadak menjadi tular di media sosial.

3. Walau bagaimanapun, saya ingin memaklumkan kepada Dewan Yang Mulia ini bahawa kaedah pengiraan yang diguna pakai oleh TNB telah disahkan dan diluluskan oleh Suruhanjaya Tenaga sebagai badan kawal selia industri bekalan elektrik negara. Kaedah yang sama juga diguna pakai oleh utiliti negara lain yang telah menghentikan bacaan bil secara fizikal dalam menangani penularan wabak COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI AHMAD FAIZAL BIN DATO'
AZUMU [TAMBUN]**

TARIKH : 18 OGOS 2020 (SELASA)

SOALAN

Minta **MENTERI PENDIDIKAN** menyatakan dalam konteks pembangunan semula sekolah daif, risiko berlakunya kemalangan bagi sekolah yang uzur, melebihi usia 20 tahun, akibat masalah pendawaian elektrik, struktur sekolah daripada kayu dan kemudahan yang usang adalah tinggi. Isu keselamatan seharusnya mendapat perhatian Kementerian Pendidikan Malaysia (KPM) yang memerlukan mereka mengambil tindakan segera bagi menjamin tahap keselamatan pelajar. Minta Kementerian menyatakan langkah-langkah yang telah diambil bagi mengatasi isu ini.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa prihatin dan terus memberi perhatian kepada usaha menyediakan fasiliti bangunan dan kemudahan sekolah yang dapat berfungsi dengan baik, untuk semua sekolah di seluruh negara. Ini adalah penting untuk memastikan pengajaran dan pembelajaran dilaksanakan dalam keadaan selamat di sekolah.

KPM juga sentiasa memantau keadaan fasiliti bangunan dan kemudahan sekolah, melalui Jabatan Pendidikan Negeri (JPN) dan Pejabat Pendidikan Daerah (PPD). Dalam hal ini, KPM mempunyai maklumat perincian mengenai fizikal komponen atau fasiliti bangunan di sekolah yang tidak sempurna, tidak berfungsi dan tidak selamat.

Untuk makluman Ahli Yang Berhormat, mulai tahun 2019, KPM melaksanakan analisis skor gred impak sebagai penambahbaikan bagi menentukan tahap keadaan fizikal komponen atau fasiliti bangunan sekolah daif. Skor ini mempunyai 7 tahap, di mana tahap 6 adalah bangunan yang tidak selamat dengan pengesahan daripada JPN dan PPD. Manakala, tahap 7 adalah bangunan yang tidak selamat dengan pengesahan daripada Jabatan Kerja Raya (JKR). Melalui penilaian ini, KPM dapat menentukan keutamaan untuk melaksanakan projek pembangunan semula atau menaik taraf bangunan sekolah yang tidak selamat digunakan.

Antara langkah yang diambil oleh KPM bagi menangani isu bangunan daif di sekolah adalah seperti berikut:

1. melakukan penyelenggaraan segera bagi bangunan sekolah yang mempunyai keperluan kritikal untuk pembaikan; dan
2. menaik taraf kemudahan infrastruktur dan menggantikan bangunan sekolah yang daif dan disahkan tidak selamat oleh pihak teknikal dengan bangunan baharu.

Pihak sekolah boleh melaporkan sebarang kerosakan bangunan di sekolah kepada JPN masing-masing untuk diambil tindakan. Pihak sekolah juga boleh melaporkan kerosakan yang memerlukan tindakan pembaikan serta-merta secara terus kepada JKR Negeri atau Daerah. Kerosakan tersebut adalah yang melibatkan bekalan elektrik terputus, pembaikan peralatan elektrik, kerosakan melibatkan runtuh struktur, mendapan dan runtuh tanah.

Untuk makluman Ahli Yang Berhormat, KPM sentiasa bekerjasama rapat dengan JKR untuk memeriksa tahap keselamatan bangunan di semua sekolah. Pada masa kini, JKR Malaysia sedang menjalankan audit pendawaian elektrik ke atas 3,881 blok yang berusia lebih 50 tahun di 1,416 buah sekolah di seluruh Malaysia. Pemeriksaan yang sedang dilaksanakan oleh JKR Malaysia adalah pemeriksaan keadaan pendawaian elektrik di blok yang terlibat sahaja.

Secara keseluruhan, dalam tempoh Rancangan Malaysia Ke -11 (RMKe-11), iaitu bagi tahun 2016 sehingga tahun 2020, sejumlah RM3.055 billion telah diluluskan untuk projek naik taraf dan pembangunan semula bagi 773 buah sekolah daif di seluruh negara. Peruntukan ini digunakan untuk menaik taraf atau membina semula bilik darjah, asrama, bangunan pentadbiran dan kemudahan lain.

Daripada peruntukan tersebut, sejumlah RM415.0 juta adalah untuk menaik taraf dan pembangunan semula 245 buah sekolah di Semenanjung Malaysia. Sejumlah RM1.388 bilion lagi untuk naik taraf dan pembangunan semula 291 buah sekolah di Sarawak manakala baki RM1.252 bilion adalah untuk naik taraf dan pembangunan semula 237 buah sekolah di Sabah.

KPM akan terus bekerjasama rapat dengan JKR Malaysia, JKR Sarawak, JKR Sabah, Kerajaan Negeri Sarawak dan Kerajaan Negeri Sabah termasuk Pihak Berkuasa Tempatan (PBT) bagi memastikan kejayaan pelaksanaan projek yang telah dirancang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 18 OGOS 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan berapa pusat pembelian padi yang telah diwujudkan dan mengapa had jarak pengutipan pusat pembelian tidak lagi dikuatkuasakan seperti dahulu.

JAWAPAN

Tuan Yang Dipertua,

1. Untuk makluman Ahli Yang Berhormat, tujuan asal penubuhan pusat belian padi adalah untuk memberi kemudahan kepada para pesawah menjual hasil padi mereka terutamanya bagi kawasan yang tidak mempunyai kilang padi berhampiran. Sehingga kini terdapat sebanyak 199 lesen pusat membeli padi yang aktif beroperasi di seluruh negara.
2. Pada masa ini, dalam mempertimbangkan permohonan pembukaan pusat belian padi baharu, Kementerian masih mengambil kira jumlah pusat belian dan kilang padi sedia ada berbanding pengeluaran padi di sesuatu kawasan. Perkara ini bagi memastikan:
 - i. kewujudan pusat belian ditempat yang tidak sesuai menjejaskan operasi pengilang padi sedia ada terutamanya dalam persaingan mendapatkan bekalan padi dan

menyebabkan beberapa kilang kecil dan sederhana tidak mampu bersaing serta terpaksa ditutup;

- ii. pusat belian padi baharu di kawasan yang telah mempunyai kilang padi berhampiran akan mewujudkan '*double handling*' yang sekaligus yang menyebabkan kos padi meningkat dan perlu ditanggung oleh kilang; dan
- iii. penghantaran padi ke pusat belian padi dan tidak dihantar terus ke kilang juga mengakibatkan berlaku susut nilai padi (berat dan mutu) yang dihasilkan oleh pesawah dan sekaligus mengurangkan pendapatan pesawah.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : DR. MASZLEE BIN MALIK
[SIMPANG RENGAM]
TARIKH : 18 OGOS 2020 (SELASA)

SOALAN

minta **MENTERI PENGAJIAN TINGGI** menyatakan adakah inisiatif "*Single Window Single Offer*" yang dilancarkan pada tahun ini berjaya mencapai objektif mengelak pertindihan tawaran kemasukan ke Matrikulasi, Asasi serta Institut Pendidikan Guru dan adakah dasar ini akan diteruskan mengambil kira Kementerian telah di pecah dua.

JAWAPAN

Tuan Yang di-Pertua,

Untuk makluman Ahli Yang Berhormat, mulai sesi akademik 2020/2021, permohonan pelajar lepasan SPM untuk melanjutkan pengajian ke Universiti Awam, Kolej Matrikulasi, Institut Pendidikan Guru, Politeknik, Kolej Komuniti dan Institusi Latihan Kemahiran Awam (ILKA) diselaraskan oleh Kementerian Pengajian Tinggi melalui satu portal tunggal *UPUOnline*.

Pelajar hanya akan membuat satu permohonan untuk melanjutkan pengajian ke program asasi, matrikulasi, diploma, sarjana muda dan sijil. Ini memberikan peluang kepada lebih ramai pelajar untuk mendapat tempat dalam melanjutkan pengajian di samping memaksimumkan penempatan pelajar ke dalam program pengajian pilihan mereka.

"Single Window Single Offer" yang dilaksanakan pada sesi akademik 2020/2021 telah berjaya mencapai objektifnya iaitu untuk mengelak pertindihan tawaran kemasukan ke IPTA, Matrikulasi, Institut Pendidikan Guru dan ILKA. Dasar ini boleh diteruskan untuk meningkatkan akses ke pendidikan tinggi selaras dengan prinsip pendidikan adalah untuk semua.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. DATO' SERI MAHDZIR KHALID
[PADANG TERAP]**

TARIKH : 18 OGOS 2020 (SELASA)

SOALAN

DATO' SERI MAHDZIR KHALID [PADANG TERAP] minta **MENTERI KEWANGAN** menyatakan bagaimanakah Kerajaan mempunyai kemampuan kewangan bagi melaksanakan inisiatif Pelan Jana Semula Ekonomi Negara (Penjana) berjumlah RM35 bilion bagi meringankan beban rakyat dan memulihkan semula ekonomi negara sedangkan sebelum ini Kerajaan Pakatan Harapan menyatakan bahawa kewangan negara berada dalam keadaan yang kritikal.

JAWAPAN

Tuan Yang di-Pertua,

1. Susulan penularan pandemik COVID-19, Kerajaan telah memperkenalkan pakej rangsangan dan pemulihan ekonomi bernilai RM295 bilion meliputi RM260 billion bagi Pakej PRIHATIN dan RM35 billion untuk pakej PENJANA bagi memastikan pertumbuhan ekonomi negara terus berdaya tahan. Pakej rangsangan dan pemulihan ekonomi ini hanya melibatkan suntikan langsung fiskal berjumlah RM45 bilion. Memandangkan kedudukan kewangan negara pada masa ini mengalami defisit, suntikan fiskal bagi melaksanakan inisiatif di bawah pakej PRIHATIN dan PENJANA akan dibiayai melalui sumber pinjaman dalam negeri.
2. Kerajaan sedar suntikan fiskal tersebut akan meningkatkan hutang, namun pada masa ini yang lebih utama adalah memastikan rakyat dan perniagaan dapat dibantu seterusnya memulihkan ekonomi negara. Ini merupakan *unprecedented crisis* dan hampir semua negara melaksanakan langkah suntikan fiskal bagi melaksanakan pakej rangsangan dan pemulihan ekonomi, seterusnya akan menyebabkan peningkatan defisit dan jumlah hutang.
3. Walau bagaimanapun, semua langkah yang telah diumumkan dalam pakej rangsangan dan pemulihan ekonomi tersebut adalah bersifat *one-off* dan tidak akan terus membebankan kewangan Kerajaan Persekutuan dalam jangka masa sederhana dan panjang. Ini adalah antara strategi Kerajaan bagi mengurangkan defisit fiskal dalam jangka masa sederhana secara berperingkat seterusnya memastikan kedudukan fiskal dan hutang negara kekal pada paras terkawal. Kerajaan akan meneruskan langkah konsolidasi fiskal dengan memberi tumpuan kepada usaha untuk meningkatkan kutipan hasil dan kecekapan perbelanjaan bagi mengukuhkan lagi kedudukan kewangan Kerajaan.

4. Untuk makluman Ahli Yang Berhormat, setelah mengambil kira pengurangan hasil berikutan unjuran Keluaran Dalam Negeri Kasar (KDNK) yang lebih rendah dan kejatuhan harga minyak mentah dunia serta pertambahan perbelanjaan bagi melaksanakan pakej rangsangan dan pemulihan ekonomi, defisit fiskal pada tahun 2020 dijangka meningkat kepada sekitar 5.8% hingga 6.0% berbanding 3.2% daripada KDNK. Berdasarkan laporan oleh agensi penarafan antarabangsa Moody's [1], negara serantau juga dijangka mencatat defisit fiskal yang tinggi seperti Singapura sekitar 15%, Jepun 8%, China 6.7% dan Korea Selatan 4%.

5. Kerajaan juga pernah mengalami defisit yang lebih tinggi sebelum ini iaitu 6.7% pada tahun 2009 selepas krisis ekonomi dunia, atau dengan izin, *Global Financial Crisis*, dan berjaya menurunkannya kepada 3.8% pada tahun 2013 (iaitu lebih kurang 3-4 tahun selepas GFC) dan 3.4% pada hujung tahun 2019. Ini adalah hasil disiplin dan pengurusan fiskal berhemah yang diamalkan oleh Kerajaan.

Nota [1]: Laporan agensi penarafan antarabangsa Moody's bertarikh 3 Julai 2020 (Singapura), 1 Jun 2020 (Jepun), 14 Mei 2020 (China) dan 23 Jun 2020 (Korea Selatan).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN SYED IBRAHIM BIN SYED NOH
[LEDANG]**

TARIKH : 18 OGOS 2020 (SELASA)

SOALAN

TUAN SYED IBRAHIM BIN SYED NOH [LEDANG] minta **MENTERI KOMUNIKASI DAN MULTIMEDIA** menyatakan secara terperinci berkenaan isu pemberian tender jalur komunikasi 5G tanpa proses tender melalui arahan menteri bertarikh 15 Mei 2020 yang kemudiannya dibatalkan semula.

JAWAPAN

Tuan Yang di-Pertua,

1. Untuk makluman Ahli Yang Berhormat, pelaksanaan pengagihan spektrum di negara ini adalah tertakluk kepada rangka kerja yang diperuntukkan di bawah Akta Komunikasi dan Multimedia 1998 dan perundangan subsidiari yang relevan termasuklah Peraturan-Peraturan Komunikasi dan Multimedia (Spektrum) 2000. Terdapat beberapa kaedah yang boleh digunakan di bawah Akta Komunikasi dan Multimedia 1998 untuk memperuntukkan spektrum kepada pemberi perkhidmatan, iaitu secara lelongan, tender atau pelaksanaan hak keutamaan (pemberian secara terus) di bawah seksyen 174 Akta Komunikasi dan Multimedia 1998.

2. Untuk makluman Ahli Yang Berhormat, pelaksanaan pengagihan jalur spektrum untuk perkhidmatan jalur lebar serta perkhidmatan 5G akan dikaji semula secara holistik. Kajian semula pengagihan spektrum ini akan melibatkan beberapa jalur spektrum termasuk jalur 700 MHz dengan mengambil kira matlamat untuk memastikan perkhidmatan 4G sedia ada dioptimumkan dan diperluaskan terutamanya di kawasan luar bandar dan pada masa yang sama, membuat persiapan ke arah pelaksanaan rangkaian 5G. Ini adalah penting untuk memastikan perkhidmatan jalur lebar sedia ada kepada rakyat dapat dipertingkatkan disamping menaik taraf perkhidmatan yang telah disediakan dengan menggunakan rangkaian teknologi terkini.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

DARIPADA : Y.B. TUAN WONG CHEN [SUBANG]

TARIKH : 18 OGOS 2020 (SELASA)

SOALAN

TUAN WONG CHEN [SUBANG] minta **MENTERI KEWANGAN** menyatakan berapa Sekuriti Kerajaan Malaysia telah dikeluarkan dan bakal dikeluarkan untuk tahun kewangan 2020.

JAWAPAN

Tuan Yang di-Pertua,

1. Bagi tempoh setengah tahun pertama 2020, Kerajaan telah menerbitkan bon dan sukuk sebanyak RM100.8 bilion merangkumi RM37.5 bilion Sekuriti Kerajaan Malaysia (MGS), Terbitan Pelaburan Kerajaan Malaysia (TPKM) sebanyak RM40.3 bilion dan bil Perbendaharaan berjumlah RM23 bilion. Daripada jumlah tersebut, sebanyak RM41.2 bilion digunakan untuk membiayai semula hutang yang matang manakala RM59.6 bilion adalah bagi membiayai defisit dalam separuh tahun pertama 2020 serta sebahagian hutang yang akan matang dan defisit fiskal pada bulan seterusnya.

2. Jumlah pinjaman kasar bagi tahun 2020 akan turut mengambil kira tambahan pinjaman bagi membiayai pelaksanaan pakej rangsangan dan pemulihan ekonomi dengan suntikan langsung fiskal berjumlah RM45 bilion, yang diperoleh sepenuhnya menerusi pinjaman domestik. Semua langkah yang telah diumumkan dalam Pakej Rangsangan Ekonomi adalah bersifat *one-off* agar tidak akan terus membebankan kewangan Kerajaan Persekutuan dalam jangka masa sederhana dan panjang. Hal ini adalah penting bagi memastikan kedudukan fiskal dan hutang negara kekal pada paras terkawal. Di samping itu, negara juga mempunyai dana kecairan yang mencukupi dan pelbagai, sekitar RM150 bilion yang disokong pasaran kewangan yang kukuh.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB DATUK IGNATIUS DORELL LEIKING
[PENAMPANG]**

TARIKH : 18 OGOS 2020 (SELASA)

SOALAN

DATUK IGNATIUS DORELL LEIKING [PENAMPANG] minta **MENTERI KOMUNIKASI DAN MULTIMEDIA** menyatakan kenapakah perkhidmatan jalur lebar internet seperti Streamyx dan Unifi di Daerah Penampang amat tidak memuaskan dan bilakah perkhidmatan tersebut dapat diperluaskan serta dipertingkatkan kepada perkhidmatan internet 4G atau yang lebih baik dengan pembinaan lebih banyak infrastruktur rangkaian selular memandangkan terdapat keperluan mendesak terutamanya kepada para pelajar sekolah dan institusi pengajian tinggi di kawasan pedalaman Penampang untuk mengikuti pembelajaran atas talian semasa sekolah dan institusi pengajian tinggi belum dibuka secara keseluruhan.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian melalui Suruhanjaya Komunikasi dan Multimedia Malaysia (SKMM) sentiasa memberi tumpuan kepada pembangunan infrastruktur komunikasi melalui penyediaan liputan jalur lebar talian tetap dan mudah alih dengan menggunakan pelbagai teknologi di seluruh negara terutama di kawasan luar bandar.
2. Untuk perkhidmatan Streamyx, teknologi yang digunakan adalah berasaskan tembaga yang mempunyai kekangan dari segi kualiti dan kelajuan capaian Internet. Oleh yang demikian, bagi meningkatkan kualiti perkhidmatan jalur lebar talian tetap, pihak SKMM juga sedang giat melaksanakan inisiatif penaiktarafan rangkaian berasaskan tembaga kepada rangkaian gentian optik yang melibatkan sebanyak 1,741 pelanggan di kawasan Penampang. Inisiatif yang dijalankan menerusi Telekom Malaysia Berhad (TM) ini dijangka akan siap secara berperingkat menjelang akhir tahun 2021. Jumlah ini akan diselaraskan dari semasa ke semasa disebabkan oleh faktor peralihan langganan pelanggan.
3. Bagi kawasan pembangunan baharu, TM juga akan menyediakan infrastruktur UniFi secara berperingkat. Pada masa ini perkhidmatan jalur lebar TM boleh didapati di beberapa kawasan di Penampang.
4. Berdasarkan status pelanggan Streamyx semasa, pada masa kini terdapat sebanyak 2,978 pelanggan daripada jumlah keseluruhan kapasiti yang ditawarkan iaitu sebanyak 15,521.
5. Manakala status bagi pelanggan UniFi semasa pula, pada masa kini terdapat sebanyak 9,646 pelanggan daripada jumlah keseluruhan kapasiti yang ditawarkan iaitu sebanyak 19,367.

6. Bagi memastikan perkhidmatan jalur lebar TM dapat ditambah baik, usaha-usaha penaiktarafan ibu sawat TM di kawasan Penampang sedang dijalankan secara berperingkat seperti berikut:

- a. Fasa Pertama (Mac 2020 sehingga Februari 2021) yang melibatkan 1,849 pelanggan;
- b. Fasa Kedua (Mac 2021-Februari 2022) yang melibatkan 1,857 pelanggan; dan
- c. Fasa Ketiga (Mac 2022-Disember 2022) yang melibatkan 155 pelanggan.

Jumlah keseluruhan pelanggan yang terlibat dengan penaiktarafan ini adalah sebanyak 3,861.

7. Bagi perkhidmatan jalur lebar mudah alih pula, setakat suku pertama 2020, tahap liputan perkhidmatan 4G di kawasan berpenduduk di daerah Penampang adalah pada tahap 95.8%.

8. Pada masa yang sama, SKMM juga sedang membuat perancangan dengan pihak industri untuk memantapkan kualiti dan liputan perkhidmatan di seluruh negara menggunakan pelbagai teknologi.

**PEMBERITAHUAN PERTANYAAN LISAN DEWAN NEGARA
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 18 OGOS 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan:

(a) berapa banyak tindakan yang telah diambil terhadap nelayan-nelayan yang menggunakan bom ikan untuk menangkap ikan di laut di seluruh Malaysia; dan

(b) apakah mekanisme yang telah diambil untuk mengurangkan nelayan-nelayan asing dari menceroboh masuk ke kawasan kita menangkap ikan dan apakah Kementerian tidak berhajat untuk mengkaji denda yang dikenakan kepada nelayan asing yang menceroboh perairan negara kepada yang lebih tinggi serta hukuman penjara.

JAWAPAN

Yang di-Pertua,

(a) Penggunaan bahan letupan untuk menangkap ikan di laut di seluruh Malaysia

1. Merujuk Seksyen 26 Akta Perikanan 1985, kaedah menangkap ikan menggunakan apa-apa bahan letupan merupakan satu kesalahan yang boleh dikenakan denda tidak melebihi RM20,000 atau penjara selama tempoh tidak melebihi 2 tahun atau kedua-duanya. Kegiatan ini juga boleh mendatangkan kecederaan atau membawa kematian kepada pelakunya.

2. Pada tahun 2019, sebanyak 39 kes rampasan hasil tangkapan ikan menggunakan bahan letupan telah direkodkan dan kes ini hanya berlaku di Negeri Sabah sahaja. Daripada jumlah kes yang direkodkan, sebanyak 4 kes telah didakwa di mahkamah.

(b) Mekanisma untuk mengatasi pencerobohan nelayan asing di perairan negara

3. Mekanisma yang telah diambil oleh Kementerian ini untuk mengatasi pencerobohan nelayan asing di perairan negara adalah melalui kerjasama strategik antara agensi penguatkuasaan seperti Agensi Penguatkuasaan Maritim Malaysia (APMM), Pasukan Polis Marin dan Tentera Laut Diraja Malaysia (TLDM). Antara tindakan yang telah diambil adalah seperti berikut:

- (i) Melaksanakan operasi penguatkuasaan bersepadu di kawasan 'hotspot' yang melibatkan Kementerian Dalam Negeri, Kementerian Pertahanan dan Kementerian Pertanian dan Industri Makanan. Sebagai contoh, Operasi NAGA 1/2019 (Ops NAGA) telah berjaya menahan sebanyak 52 buah vesel nelayan asing yang menceroboh perairan negara.

- (ii) Mempergiatkan aktiviti *Monitoring, Controlling and Surveillance* (MCS) vesel penangkapan ikan melalui Vessel Monitoring System (VMS) dan *Automatic Identification System* (AIS) oleh Jabatan Perikanan Malaysia (DOF); dan
 - (iii) Melaksanakan *pilot project* bagi penggunaan *Quick Response Code* (QR Code) dan *Radio Frequency Identification* (RFID) ke atas vesel laut dalam sebagai kaedah identifikasi dan pemantauan vesel tempatan di laut.
4. Kementerian telah melaksanakan pindaan Akta Perikanan 1985 pada 1 September 2019 yang membolehkan kadar denda maksimum dikenakan ke atas vesel penangkapan ikan asing yang menceroboh perairan Malaysia, iaitu daripada RM1 juta kepada RM6 juta bagi nakhoda dan bagi tiap-tiap anggota kru dari RM100 ribu kepada RM600 ribu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK IGNATIUS DORELL LEIKING
[PENAMPANG]**

TARIKH : 18 OGOS 2020 (SELASA)

SOALAN

Minta **MENTERI PENDIDIKAN** menyatakan status tender terbuka dan jangkaan permulaan pembinaan Sekolah Menengah Kebangsaan Kipouvo di daerah Penampang yang mempunyai 24 buah bilik kelas seperti yang diumumkan pada bulan Februari 2019 oleh Timbalan Menteri Pelajaran ketika itu yang mana projek tersebut pertama kali diumumkan oleh Kerajaan Barisan Nasional pada tahun 2012.

JAWAPAN

Tuan Yang di-Pertua,

Untuk makluman Ahli Yang Berhormat, Projek Pembinaan Sekolah Menengah Kebangsaan Kipouvo di Penampang, Sabah telah diluluskan dalam *rolling plan* 1 (Tahun 2016), Rancangan Malaysia Ke-11. Skop projek ini meliputi pembinaan baharu bilik darjah dan kemudahan lain.

Pelaksanaan projek ini adalah di bawah Kementerian Pendidikan Malaysia (KPM). KPM telah mendapatkan kelulusan Pelan Pembangunan (*Development Plan*) daripada Pihak Berkuasa Tempatan pada 12 Februari 2019 dan juga kelulusan Pelan Bangunan (*Building Plan*) projek pula pada 19 November 2019.

Sehingga 17 Ogos 2020, projek ini berada di dalam fasa prabina. KPM telah memuktamadkan dokumen tender projek dan diiklankan pada hari ini, iaitu 18 Ogos 2020. Pembinaan projek dijangka bermula pada akhir bulan November 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 18 OGOS 2020 (SELASA)

SOALAN

Minta **MENTERI PENDIDIKAN** menyatakan sama ada pengenalan tulisan jawi akan diteruskan dalam buku teks baharu darjah 5 untuk SK dan SJK.

JAWAPAN

Tuan Yang di-Pertua,

Mengikut Akta Pendidikan 1996 (Akta 550), terdapat peruntukan yang menetapkan bahawa Kurikulum Kebangsaan hendaklah digunakan oleh semua sekolah dalam Sistem Pendidikan Kebangsaan. Akta tersebut juga menyatakan bahawa Kurikulum Kebangsaan hendaklah termasuk mata pelajaran teras. Bahasa kebangsaan, iaitu Bahasa Melayu, merupakan salah satu mata pelajaran teras dalam kurikulum kebangsaan. Oleh itu, mata pelajaran teras ini hendaklah menjadi asas yang mesti dipelajari oleh semua murid di semua sekolah kerajaan, sekolah bantuan kerajaan dan sekolah swasta.

Berkaitan dengan pengenalan tulisan jawi dalam mata pelajaran Bahasa Melayu, kerajaan pada 14 Ogos 2019 telah membuat keputusan supaya bilangan muka surat buku teks dikurangkan daripada 6 muka surat mengikut cadangan asal kepada 3 muka surat sahaja. Kerajaan juga memutuskan agar pengenalan tulisan jawi terus dilaksanakan di Sekolah Jenis Kebangsaan (SJK) dan sekolah mubaligh bantuan Kerajaan jika dipersetujui oleh Persatuan Ibu Bapa dan Guru (PIBG) serta murid.

Mengambil kira Akta Pendidikan 1996, KPM akan memperhalusi semula perkara berkaitan dengan tulisan jawi ini secara menyeluruh dan holistik. Buat masa ini, keputusan Jemaah Menteri sebelum ini dikekalkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : YB TUAN CHOW KON YEOW [BERUAS]

TARIKH : 18 OGOS 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan inisiatif bagi memastikan sumber bekalan air untuk sawah padi adalah mencukupi terutamanya pada musim kemarau. Adakah terdapat penyelesaian jangka panjang bagi masalah pengairan untuk kawasan penanaman padi di Seberang Perai Utara, Pulau Pinang yang melibatkan pam air Bumbung Lima dan Pinang Tunggal.

JAWAPAN

1. Untuk makluman Yang Berhormat Ahli Parlimen Tanjong, Pihak MET Malaysia telah melaporkan pada 31 Disember 2019 bahawa Negeri Pulau Pinang akan mengalami kekurangan taburan hujan dari bulan Januari sehingga Mac Tahun 2020. Keluasan kawasan bertanam padi bagi daerah Seberang Perai Utara (SPU) adalah seluas 7,946.86 hektar.

2. Selain daripada isu penyelesaian jangka pendek seperti penyediaan pam-pam bergerak, pembinaan telaga tiub dikawasan-kawasan yang bermasalah sumber air, penjadualan semula dan pembenihan awan OPA oleh MET, langkah-langkah jangka panjang juga turut diambil kira. Antara perancangan dan tindakan yang diambil bagi penyelesaian jangka panjang oleh semua pihak terlibat antaranya seperti berikut :

ISU	SYOR PENYELESAIAN	STATUS
1. Seberang Perai Utara (Bakar Bata, Paya Keladi, Lahar Tiang, Paya Cina, Permatang Saga, Permatang Damar, Permatang Langsung)	<ul style="list-style-type: none"> • Kerja-Kerja Menaiktaraf Sistem Pam Elektrik Beserta Dengan Kelengkapan Dan Kerja-Kerja Berkaitan Di Rumah Pam Pinang Tunggal, Skim Pengairan Pinang Tunggal, Seberang Perai Utara, Pulau Pinang • Kerja-Kerja Menaiktaraf Rumah Pam Di Pusat Kecemerlangan Teknologi Padi Bumbung Lima, Daerah SPU, Pulau Pinang (Anggaran Kos: RM500,000.00) • Kerja-Kerja Menaiktaraf Pam Di Pusat Kecemerlangan Teknologi Padi Bumbung Lima, Daerah SPU, Pulau Pinang (Anggaran Kos: RM500,000.00) • Perkhidmatan Mengangkut, Memasang, Mengoperasikan Serta Menyelenggara Pam Bergerak Di Kawasan Bendang Di Negeri Pulau Pinang (Anggaran Kos: RM200,000.00) • Kerja – kerja pembinaan telaga 	<p>Kos Projek: RM3,595,000.00</p> <p>Tarikh Mula: 31 Januari 2019</p> <p>Tarikh Siap: 5 Disember 2019</p> <p>EOT 1: 23 Julai 2020</p> <p>EOT 2: 20 Februari 2021</p> <ul style="list-style-type: none"> • Penyediaan dokumen tender dan dijangkakan iklan pada bulan Ogos 2020. • Telah mengemukakan permohonan peruntukkan kepada MAFL. Masih menunggu kelulusan dan waran • Sedang dilaksanakan

	<p>tiub. (Anggaran Kos: RM 300,000.00)</p> <ul style="list-style-type: none"> •Bekalan Minyak bagi penggunaan pam bergerak berkapasiti 3 cusec sebanyak 40 buah pam.(Anggaran Kos: RM 118,000.00) 	<ul style="list-style-type: none"> • Sedang dilaksanakan • Telah mengemukakan permohonan peruntukkan kepada MAFI.
--	--	---

3. Beberapa mesyuarat telah diadakan di antara agensi - agensi berkaitan bagi membincangkan isu bekalan air. Susulan daripada perbincangan dan mesyuarat yang telah diadakan, pelbagai langkah mitigasi jangka pendek dan penyelesaian jangka panjang telah diputuskan. Bagi penanaman padi pada musim yang seterusnya akan disusun dengan mengambil kira laporan ramalan hujan oleh MET Malaysia.

Selain itu, pengurusan air yang cekap perlu dipantau bagi mengelakkan pembaziran sumber air. Penekanan terhadap kerjasama Jabatan Pertanian dan PPK adalah perlu bagi penyelarasan agihan bekalan air di kawasan terlibat ketika terjadinya masalah bekalan. Walau bagaimana pun, pematuhan pada jadual tanaman perlulah mendapat kerjasama semua pihak agar sumber bekalan dapat diuruskan dengan baik dan optimum. Kerjasama semua pihak amatlah diharapkan untuk menangani isu bekalan air ini.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN JUGAH ANAK MUYANG @
TAMBAT [LUBOK ANTU]**

TARIKH : 18 OGOS 2020 (SELASA)

SOALAN

YB TUAN JUGAH ANAK MUYANG @ TAMBAT [LUBOK ANTU]
minta **MENTERI KOMUNIKASI DAN MULTIMEDIA** menyatakan apakah
langkah-langkah yang diambil untuk meningkatkan liputan
telekomunikasi dan jalur lebar khususnya sekolah-sekolah pedalaman di
Parlimen Lubok Antu.

JAWAPAN

Tuan Yang di-Pertua,

1. Untuk makluman Ahli Yang Berhormat, Kementerian melalui Suruhanjaya Komunikasi dan Multimedia Malaysia (SKMM) sentiasa memberi tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi untuk membolehkan rakyat menikmati akses kepada perkhidmatan jalur lebar berkelajuan tinggi yang lebih menyeluruh.
2. Sehingga bulan Jun 2020, antara inisiatif-inisiatif penyediaan jalur lebar yang sedang dilaksanakan oleh Kerajaan adalah penyediaan kemudahan jalur lebar talian tetap di kawasan pinggir bandar di mana 32 sambungan sedang dalam pelaksanaan di Parlimen Lubok Antu dan dijangka akan siap secara berperingkat pada penghujung tahun 2020.
3. Pihak Kerajaan juga turut melaksanakan inisiatif peluasan liputan jalur lebar mudah alih yang melibatkan pembinaan sebanyak 22 menara komunikasi yang telah siap dan beroperasi di Parlimen Lubok Antu.
4. Selain itu, sebanyak 29 alat pemancar komunikasi di menara komunikasi sedia ada telah dinaik taraf kepada perkhidmatan 3G dan 4G di Parlimen Lubok Antu.
5. Bagi meningkatkan kualiti perkhidmatan jalur lebar talian tetap, fasiliti di kawasan Lubok Antu akan dinaik taraf dari perkhidmatan rangkaian berasaskan tembaga kepada rangkaian gentian optik. Inisiatif yang akan dilaksanakan menerusi Telekom Malaysia Berhad (TM) ini dijangka akan siap secara berperingkat menjelang akhir tahun 2021. Jumlah ini dijangka akan diselaraskan dari semasa ke semasa disebabkan oleh faktor peralihan langganan pelanggan.
6. Berkaitan liputan komunikasi dan jalur lebar di sekolah-sekolah, pada masa ini terdapat pelbagai teknologi yang boleh digunakan untuk menyediakan capaian internet seperti melalui rangkaian gentian optik,

perkhidmatan jalur lebar mudah alih ataupun teknologi satelit. Teknologi yang boleh digunakan adalah bergantung kepada ketersediaan infrastruktur di sekolah-sekolah berkenaan. Kebiasaannya di kawasan-kawasan pedalaman, perkhidmatan satelit sering digunakan berikutan ketiadaan capaian gentian optik mahupun perkhidmatan mudah alih.

7. Untuk penambahbaikan capaian internet di sekolah-sekolah yang berada di kawasan pedalaman, Kementerian akan bekerjasama dengan pihak Kementerian Pendidikan Malaysia dan pihak industri untuk menaik taraf infrastruktur komunikasi di kawasan sekolah-sekolah secara berperingkat untuk membolehkan perkhidmatan jalur lebar yang berkualiti dapat disediakan ke sekolah-sekolah.

8. Pada masa yang sama, SKMM juga sedang membuat perancangan dengan pihak industri untuk memantapkan kualiti dan liputan perkhidmatan di seluruh negara menggunakan pelbagai teknologi.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. TUAN CHANG LIH KANG
[TANJONG MALIM]**

TARIKH : 18 OGOS 2020 (SELASA)

SOALAN

TUAN CHANG LIH KANG [TANJONG MALIM] minta **MENTERI KEWANGAN** menyatakan sama ada Kerajaan akan mengguna kaedah 'debt monetisation' ataupun menjual sekuriti Kerajaan kepada Bank Negara untuk menjana dana untuk memulihkan ekonomi negara.

JAWAPAN

Tuan Yang di-Pertua,

1. Kerajaan telah melaksanakan pakej stimulus dan program pemulihan ekonomi menerusi Pakej PRIHATIN dan PENJANA dengan suntikan fiskal berjumlah RM45 bilion yang akan dibiayai oleh pinjaman domestik. Kerajaan melaksanakan strategi pembiayaan secara berhemat di samping mematuhi perundangan berkaitan hutang yang ditetapkan. Ini termasuk memberi tumpuan kepada terbitan dalam denominasi ringgit untuk menyokong pasaran bon tempatan di samping mengurangkan kos dan pendedahan risiko tukaran mata wang asing. Kesemua terbitan bon dan sukuk Kerajaan iaitu Sekuriti Kerajaan Malaysia (MGS) dan Terbitan Pelaburan Kerajaan Malaysia (MGII) dilaksanakan secara tender terbuka di mana semua pelabur boleh mengurus niaga dengan yakin dan pada masa sama menggalakkan dagangan sekuriti kerajaan pada harga kompetitif.

2. Dalam tempoh separuh pertama 2020, permintaan bagi terbitan MGS dan MGII masih tinggi. Purata nisbah bidaan kepada terbitan (*bid-to-cover ratio*) yang mencatat lebihan langganan melebihi 2 kali, disokong oleh permintaan daripada institusi tempatan yang kukuh dan kecairan mencukupi sekitar RM150 bilion dalam pasaran domestik. Sokongan padu juga diperolehi daripada pelbagai kategori pelabur seperti dana persaraan, pelabur institusi, syarikat insurans dan institusi perbankan serta institusi kewangan pembangunan.

3. Di samping itu, penyertaan pelabur asing dalam pasaran sekuriti Kerajaan kekal stabil sekitar 20% daripada jumlah kertas hutang Kerajaan berdenominasi ringgit pada akhir Mac 2020. Kepelbagaian asas pelabur menjadikan aktiviti pasaran sekunder sekuriti Kerajaan lebih aktif, seterusnya menyebabkan kos pembiayaan Kerajaan lebih rendah dan stabil.

Tuan Yang di-Pertua,

4. Untuk makluman juga, pemegangan Bank Negara Malaysia (BNM) dalam kertas hutang Kerajaan yang merangkumi MGS, MGII dan bil Perbendaharaan telah meningkat kepada 1.5% pada akhir Mac 2020 berbanding 0.6% pada akhir-2019. Pemegangan BNM dalam kertas hutang Kerajaan adalah sebahagian daripada operasi dasar monetari negara bagi pengurusan kecairan pasaran. BNM juga telah mengumumkan penurunan nisbah Keperluan Rizab Berkanun (*Statutory Reserve Requirement – SRR*) sebanyak 100 mata asas kepada 2.00% pada bulan Mac 2020 serta fleksibiliti SRR tambahan yang diberikan kepada Peniaga Utama (*Principal Dealers*) dengan mengiktiraf MGS dan MGII sebagai sebahagian daripada pematuhan SRR. Langkah ini telah menambah mudah tunai bernilai kira-kira RM30 bilion ke dalam sistem perbankan dan ianya merupakan sebahagian daripada usaha berterusan BNM dalam memastikan mudah tunai adalah mencukupi untuk menyokong aktiviti pengantaraan kewangan. Oleh yang demikian, tiada keperluan bagi BNM untuk melaksanakan *debt monetisation*. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

DARIPADA : Y.B. TUAN LIM GUAN ENG [BAGAN]

TARIKH : 18 OGOS 2020 (SELASA)

SOALAN

TUAN LIM GUAN ENG [BAGAN] minta **MENTERI KEWANGAN** menyatakan senarai projek-projek yang diumumkan dalam Belanjawan 2020 tetapi dibatalkan mengikut pecahan negeri. Mengapa negeri Pulau Pinang disasarkan apabila projek pengangkutan awam dengan jaminan pinjaman RM10 bilion dan kereta kabel Bukit Bendera sebanyak RM100 juta dibatalkan.

JAWAPAN

Tuan Yang di-Pertua,

Untuk makluman Yang Berhormat, susulan penularan wabak COVID-19 yang melanda dunia pada ketika ini, ianya telah menyebabkan beberapa inisiatif yang diumumkan dalam Belanjawan 2020 tidak lagi signifikan untuk dilaksanakan dan perlu dikaji semula termasuk projek kereta kabel Bukit Bendera, Pulau Pinang.

Kerajaan juga mengalami kekangan dalam melaksanakan projek-projek infrastruktur yang besar pada masa ini terutamanya akibat Perintah Kawalan Pegerakan (PKP) serta terpaksa mengagihkan semula peruntukan tersebut untuk menampung ruang fiskal serta inisiatif-inisiatif yang telah diumumkan dalam Pakej Rangsangan Ekonomi Perihatin Rakyat (PRIHATIN) dan Pelan Jana Semula Ekonomi Negara (PENJANA). Sehubungan itu, Kerajaan akan meneliti semula keperluan untuk melaksanakan projek-projek ini pada masa hadapan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : PUAN RUSNAH BINTI ALUAI
[TANGGA BATU]**

TARIKH : 18 OGOS 2020 (SELASA)

SOALAN

Minta **MENTERI PERTANIAN DAN INDUSTRI MAKANAN** menyatakan apakah dasar dan kriteria dalam pengagihan bantuan Lembaga Kemajuan Ikan Malaysia (LKIM) kepada ahli persatuan nelayan.

JAWAPAN

Yang di-Pertua,

1. Kementerian melalui Lembaga Kemajuan Ikan Malaysia (LKIM) pada dasarnya berperanan untuk memperbaiki kedudukan sosio-ekonomi nelayan melalui program/projek peningkatan pendapatan nelayan. Dalam usaha ini, pelbagai bantuan yang disediakan oleh Kerajaan kepada nelayan yang berdaftar dengan Jabatan Perikanan Malaysia (DOF) antaranya Elaun Sara Hidup (ESH) sebanyak RM250 sebulan bagi mengurangkan kos sara hidup, Insentif Hasil Pendaratan Ikan (IHTI) sebanyak 10sen/kg dan subsidi minyak diesel dan petrol pada harga RM1.65/liter bagi menampung sebahagian kos operasi menangkap ikan serta menstabilkan pendapatan nelayan.

2. LKIM juga menyediakan Bantuan Bencana Alam Nelayan dalam bentuk tunai kepada mangsa dan keluarga kepada nelayan yang tidak mengambil insurans perlindungan keselamatan sekiranya berlaku kemalangan, kemusnahan atau kerosakan harta benda dan kehilangan nyawa. Pada masa sama, pinjaman mudah kepada nelayan secara perseorangan atau persatuan bagi aktiviti berkaitan perikanan turut disediakan. Pelaksanaan ini bertujuan untuk mengurangkan kebergantungan dan pengaruh orang tengah dalam kehidupan nelayan.

3. Skim Pinjaman Nelayan Pantai (SNEP) disediakan untuk meningkatkan keupayaan bot, peralatan dan kelengkapan tradisi sedia ada ke arah penggunaan teknologi yang lebih berinovasi. Kriteria pemohon adalah terbuka kepada nelayan pantai/ bot hakmilik penuh atau pemilik tunggal (nelayan tulen) yang menggunakan sampan berenjin sangkut dan tidak mempunyai bebanan hutang atau disenarai hitam oleh institusi kewangan. Had pinjaman adalah di antara RM1,000 hingga RM25,000 dengan tempoh pinjaman sehingga 72 bulan tanpa faedah pinjaman.

4. Manakala Skim Pinjaman Nelayan Enjin Dalam (SNED) pula disediakan kepada nelayan yang menggunakan bot berenjin dalam mengikut zon tangkapan A, B atau C. Kriteria pemohon adalah terbuka kepada individu/ bot hakmilik penuh atau pemilik tunggal (nelayan tulen) dan yang tidak mempunyai bebanan hutang atau disenarai hitam oleh institusi kewangan. Pemohon juga perlu mempunyai lesen/ permit yang sah serta mendapatkan pengesahan DOF jika bot berkenaan telah dipindah milik kepada pemohon. Had pinjaman adalah di antara RM5,000 hingga RM75,000 dengan tempoh pinjaman sehingga 72 bulan dan dikenakan kadar faedah pinjaman sebanyak 2 % setahun.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KETIGA
PARLIMEN KE-EMPAT BELAS**

PERTANYAAN : LISAN

**DARIPADA : TUAN AKMAL NASRULLAH MOHD
NASIR [JOHOR BAHRU]**

TARIKH : 18 OGOS 2020 (SELASA)

SOALAN

Minta **MENTERI PENGANGKUTAN** menyatakan apakah status terkini projek pembangunan Iskandar Malaysia Bas Rapid Transit (BRT) di Johor dan bilakah tarikh dijangka akan mula dibina serta beroperasi.

JAWAPAN

Yang di-Pertua,

1. Untuk makluman Yang Berhormat, Projek Iskandar Malaysia Bus Rapid Transit (IMBRT) mempunyai liputan rangkaian sepanjang 2051km yang terdiri daripada 63km (*Trunk Line*), 1,247 km (*Direct Line*) dan 741km (*Feeder Line*) yang melibatkan pelbagai laluan. Perkhidmatan BRT ini mampu menampung seramai 4,500 jumlah penumpang perjam sehalu. Reka Bentuk IMBRT amat menitikberatkan pelan operasi yang strategik untuk ketiga-tiga perkhidmatan yang ditawarkan iaitu *Trunk Line*, *Direct Line* dan *Feeder Line*. Kementerian Pengangkutan bekerjasama rapat dengan IRDA bagi projek ini.

2. Projek IMBRT kini berada di peringkat rekabentuk kejuruteraan terperinci. Perunding utama projek IMBRT yang dilantik bertanggungjawab untuk menyediakan rekabentuk kejuruteraan terperinci dan perkhidmatan penyeliaan pembinaan bagi pelaksanaan projek IMBRT Fasa 1. Mengikut perancangan, fasa 1 dijangka bermula pada akhir tahun 2020.

3. Pihak Berkuasa Wilayah Pembangunan Iskandar (IRDA) selaku agensi pelaksana telah melantik perunding utama bagi projek Iskandar Malaysia Bus Rapid Transit (IMBRT) setelah mendapat kelulusan daripada Kementerian Kewangan Malaysia pada 11 November 2019.

4. Ujian perintis akan dimulakan pada suku ke-empat 2020 bagi jarak sejauh 4 km dari Horizon Hills ke Anjung, Medini. Di mana untuk memperlihatkan kepada agensi-agensi kerajaan dan orang awam mengenai teknologi hijau terkini yang mungkin dapat dilaksanakan di dalam projek BRT serta untuk memudahkan cara proses penilaian kelulusan pelesenan jenis kenderaan (*Vehicle Type Approval*).

5. Mengikut perancangan, operasi IMBRT dijangka bermula pada hujung tahun 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

DARIPADA : Y.B. TUAN CHOW KON YEOW [TANJONG]

TARIKH : 18 OGOS 2020 (SELASA)

SOALAN

TUAN CHOW KON YEOW [TANJONG] minta **MENTERI KEWANGAN** menyatakan perkembangan permohonan bas elektrik oleh Kerajaan Negeri Pulau Pinang kepada Prasarana Malaysia Berhad. Juga perincian maklum balas berhubung permohonan tambahan bilangan bas (daripada yang sedia ada) bagi meningkatkan operasi Rapid Penang Sdn. Bhd. kini termasuk memperkenalkan perkhidmatan bas mini bagi kawasan-kawasan perumahan serta luar bandar.

JAWAPAN

Tuan Yang di-Pertua,

Kementerian Kewangan (MOF) sedang giat untuk merangsang ekonomi negara berikutan kelembapan ekonomi akibat penularan wabak Covid-19. Pelbagai usaha telah dijalankan oleh Kerajaan dalam menangani masalah ekonomi semasa di samping mengawal penularan wabak Covid-19 di seluruh negara.

Susulan daripada itu, MOF telah mengkaji semula keperluan bagi pembelian bas elektrik untuk pengangkutan awam di bandar-bandar terpilih seluruh negara (termasuk Pulau Pinang) dan pelaksanaan program ini ditangguhkan. Keperluan ini boleh dipertimbangkan semula pada masa hadapan sekiranya terdapat keperluan mendesak bagi perolehan bas elektrik. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

DARIPADA : Y.B. TUAN WONG HON WAI [BUKIT BENDERA]

TARIKH : 18 OGOS 2020 (SELASA)

SOALAN

TUAN WONG HON WAI [BUKIT BENDERA] minta **MENTERI KEWANGAN** menyatakan senarai statistik bilangan permohonan, peratus kelulusan serta jumlah dana yang telah disalurkan melalui *Special Relief Facility* dan jaminan untuk SME dan Micro SME antara bulan Mac 2020 hingga terkini dan sama ada dana tersebut telah mencapai matlamatnya untuk membantu SME dan Mikro SME dalam krisis COVID-19 memandangkan banyak rungutan terhadap Kerajaan.

JAWAPAN

Tuan Yang di-Pertua,

Statistik bagi *Special Relief Facility* (SRF) setakat 31 Julai 2020 adalah seperti berikut:

SRF	Permohonan diterima		Permohonan diluluskan		Kadar Kelulusan (%)
	No.	RM (Juta)	No.	RM (Juta)	
31 Julai 2020	36,986	20,693.4	21,240	10,070.9	79.0

Kerajaan percaya SRF telah dapat membantu meringankan beban aliran tunai PKS yang terkesan akibat penularan wabak COVID-19. Namun, memandangkan SRF baru dilancarkan, maka sejauh mana keberkesanannya dalam membantu PKS masih memerlukan sedikit tempoh sebelum dapat ditentukan. Kerajaan maklum terdapat rungutan terutamanya tentang kelulusan permohonan. Di antara sebab-sebab utama permohonan pembiayaan daripada PKS ditolak adalah seperti berikut:

- i. Keupayaan pembayaran balik yang lemah;
- ii. Tahap keberhutangan yang tinggi;
- iii. Perniagaan tidak berdaya maju (*not viable*); dan
- iv. Gagal memenuhi kriteria kelayakan (contoh: tidak menepati definisi PKS).

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KEDUA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN HANNAH YEOH TSEOW SUAN
[SEGAMPUT]**

TARIKH : 18 OGOS 2020 (SELASA)

SOALAN

Puan Hannah Yeoh Tseow Suan [Segambut] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah status terkini penggubalan Rang Undang-Undang (RUU) Gangguan Seksual dan Rang Undang-Undang (RUU) Profesion Kerja Sosial dan bilakah kedua-dua RUU ini akan dibentangkan di Parlimen.

JAWAPAN

Tuan Yang di-Pertua,

Kedua-dua draf RUU GS dan RUU PKS telah disediakan oleh Kementerian Pembangunan Wanita, Keluarga dan Masyarakat (KPWKM) dengan mengambil kira pandangan pelbagai pihak melalui penubuhan satu pasukan projek khas yang terdiri daripada pihak berkepentingan meliputi pelbagai Kementerian dan Agensi, ahli akademik, Pertubuhan Bukan Kerajaan (NGO) dan individu-individu yang mempunyai pengalaman dan pengetahuan berkenaan isu-isu spesifik berkaitan gangguan seksual dan profesion kerja sosial. Penglibatan dan konsultasi dengan pelbagai pihak ini telah banyak membantu dalam mempercepatkan lagi proses penyediaan draf RUU tersebut.

Bagi draf RUU PKS, ia kini di peringkat akhir penggubalan sebelum dikemukakan kepada Bahagian Gubalan, Jabatan Peguam Negara. Draft berkaitan kesalahan dan penalti telah disemak oleh Bahagian Pendakwaan, Jabatan Peguam Negara pada bulan Januari 2020.

Berhubung RUU GS pula, draf awal RUU telah dikemukakan ke Jabatan Peguam Negara pada 23 Januari 2020 untuk pemakluman pihak mereka. Sebagai tindakan susulan, KPWKM pada 7 Februari 2020 telah mengadakan satu mesyuarat yang melibatkan Jabatan Peguam Negara, BHEUU, Pejabat Ketua Pendaftar Mahkamah Persekutuan dan ahli-ahli pasukan khas yang membantu menggubal RUU ini. Melalui mesyuarat tersebut, pihak Jabatan Peguam Negara telah mengemukakan pandangan dan cadangan penambahbaikan pada draf RUU GS dan pada masa kini ia sedang di fasa akhir penyediaan dan pengemaskinian oleh KPWKM.

Berdasarkan perancangan asal, kedua-dua RUU ini dicadangkan untuk dibentangkan di Parlimen sekitar bulan Mac 2020. Namun demikian, mengambil kira perubahan struktur Kerajaan terkini, cadangan penggubalan kedua-dua RUU tersebut perlu dibentangkan semula kepada Jemaah Menteri untuk pertimbangan dan keputusan Kerajaan semasa. Selain itu, beberapa perubahan juga perlu dibuat ke atas

SOALAN NO. : 37

perancangan asal penggubalan RUU ini berikutan Perintah Kawalan Pergerakan yang dilaksanakan oleh Kerajaan dalam menangani pandemik COVID-19.

Kementerian merancang untuk membentangkan bacaan pertama kedua-dua RUU GS dan RUU PKS dalam Mesyuarat Ketiga Penggal Ketiga Parlimen Keempat Belas tahun 2020 yang dijangka pada hujung tahun ini.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. DATO' HAJI MOHD FASIAH
BIN MOHD FAKEH [SABAK BERNAM]**

TARIKH : 18 OGOS 2020 (SELASA)

SOALAN

DATO' HAJI MOHD FASIAH BIN MOHD FAKEH [SABAK BERNAM] minta **MENTERI KEWANGAN** menyatakan jumlah hutang negara pada April 2018 dan terkini April 2020 serta nyatakan apakah langkah fiskal dan monetari yang sedang dan akan diambil oleh Kerajaan untuk menangani permasalahan bebanan hutang negara ini dan dalam masa yang sama memastikan pembangunan negara terus mapan dan golongan B40 terus terbela.

JAWAPAN

Tuan Yang di-Pertua,

1. Kedudukan hutang Kerajaan Persekutuan bagi tempoh 2018 hingga Jun 2020 adalah seperti berikut:

Tempoh	Hutang Keseluruhan			Hutang Statutori[1]
	RM bilion	% kepada KDNK	% Bayaran Khidmat Hutang kepada Hasil	% kpd KDNK
2018	741.0	51.2	13.1	47.5
2019	793.0	52.5	12.5	48.7
Jun 2020	854.1	57.7	14.3 (anggaran 2020)	53.2

Nota [1]: Berdasarkan Perintah Pinjaman (Tempatan) (Had Statutori Pinjaman) dan Pendanaan Kerajaan (Had Statutori Wang Yang Diterima) 2009 [P.U (A) 241/2009], had statutori hutang sebanyak 55% daripada KDNK hanyalah meliputi hutang terkumpul bagi instrumen MGS, MGII dan Bil Perbendaharaan Islam Malaysia (MITB) sahaja.

2. Secara amnya, hutang Kerajaan Persekutuan akan meningkat setiap tahun selagi kedudukan kewangan Kerajaan berada dalam kedudukan defisit. Oleh yang demikian, pada Jun 2020, hutang Kerajaan Persekutuan telah meningkat kepada RM854.1 bilion atau 57.7% kepada KDNK, sebahagian besarnya untuk membiayai pakej rangsangan dan pelan pemulihan ekonomi. Berdasarkan pengiraan had statutori, nisbah hutang terkumpul Kerajaan Persekutuan kepada KDNK berada pada paras 53.2%, iaitu masih di bawah had statutori 55% KDNK yang ditetapkan. Dalam masa yang sama, Kerajaan berupaya untuk membayar komitmen hutang mengikut masa yang ditetapkan, di mana bayaran khidmat hutang

merupakan 14.3% daripada jumlah hasil, iaitu kurang daripada had 15% yang ditetapkan secara dalaman.

3. Kerajaan akan terus membuat pinjaman baharu setiap tahun bagi membiayai semula kertas hutang yang matang dan menampung perbelanjaan pembangunan seperti pembinaan sekolah, hospital dan jalan. Bagi tahun 2020, pinjaman tambahan yang dibuat juga adalah untuk membiayai pakej rangsangan dan pelan pemulihan ekonomi. Kesemua ini menjadi pelaburan untuk jangka masa panjang demi kesejahteraan rakyat. Kerajaan juga kekal komited dalam agenda pembangunan negara dan akan memastikan keseimbangan pembangunan tidak terjejas dalam usaha mengurangkan hutang Kerajaan.

4. Dalam memastikan paras hutang Kerajaan Persekutuan terkawal dan terurus, Kerajaan akan meneruskan langkah pengukuhan dan konsolidasi fiskal secara beransur-ansur sebaik sahaja krisis ekonomi ini berakhir dan ekonomi kembali pulih. Situasi semasa turut menunjukkan betapa perlunya Kerajaan meluas dan mempelbagaikan asas percukaian negara supaya tidak terlalu bergantung kepada hanya cukai langsung dan hasil berasaskan petroleum. Selain itu, Akta Kebertanggungjawaban Fiskal (*Fiscal Responsibility Act*) dijangka akan dibentangkan pada 2021 untuk mengukuhkan tadbir urus, ketelusan dan akauntabiliti dalam pengurusan fiskal. Dalam masa yang sama, Kerajaan perlu mengutamakan pinjaman dalam negeri bagi memastikan risiko tukaran wang asing dan kos pinjaman yang lebih rendah. Pematuhan kepada disiplin fiskal ini adalah penting bagi memastikan kedudukan kewangan negara kekal kukuh serta meningkatkan ruang fiskal pada masa hadapan.

Tuan Yang di-Pertua,

5. Dari aspek monetari, Bank Negara Malaysia (BNM) sentiasa memastikan kedudukan mudah tunai yang mencukupi di dalam sistem kewangan. Bagi mengukuhkan kedudukan sistem kewangan, BNM telah melaksanakan beberapa langkah monetari untuk meningkatkan lebihan mudah tunai di dalam sistem tersebut. Langkah ini telah memastikan

pasaran kewangan terutamanya pasaran bon berada dalam keadaan teratur dan memudahkan Kerajaan untuk menerbitkan bon dan memperoleh dana pada kadar hasil yang kompetitif dan seterusnya akan meringankan bebanan perbelanjaan khidmat hutang kerajaan.

6. Antara langkah yang telah dilaksanakan oleh BNM adalah penurunan kadar Nisbah Keperluan Rizab Berkanun (SRR) sebanyak 100 mata asas daripada 3.00% kepada 2.00% pada bulan Mac dan Mei 2020. Institusi perbankan juga diberikan fleksibiliti melalui pengiktirafan Sekuriti Kerajaan Malaysia dan Terbitan Pelaburan Kerajaan Malaysia sebagai sebahagian daripada pematuhan SRR. Sehubungan itu, untuk memastikan pasaran bon domestik berada dalam keadaan teratur, BNM turut mengambil bahagian di dalam pembelian bon dalam pasaran sekiranya diperlukan dalam keadaan-keadaan yang tertentu. Secara keseluruhan, langkah ini telah menambah mudah tunai sebanyak RM54 bilion ke dalam sistem perbankan.

7. Selain itu, BNM juga telah menurunkan Kadar Dasar Semalaman (OPR) sebanyak 125 mata asas daripada 3.00% ke 1.75% dalam masa 7 bulan pertama 2020. Penurunan OPR ini merupakan paras terendah sejak tahun 2004. Berturutan pengurangan OPR bertujuan terutamanya untuk menyokong menambahbaikkan kegiatan ekonomi serta memberikan rangsangan dasar tambahan untuk mempercepat kadar pemulihan ekonomi.

Tuan Yang di-Pertua,

8. Kerajaan sedar bahawa perhatian juga perlu diberikan untuk membantu mengurangkan beban kewangan golongan isi rumah berpendapatan 40% terendah. Antara langkah-langkah sedia ada yang telah diambil oleh Kerajaan bagi membantu mengurangkan beban kewangan mereka termasuklah:

- a. Meningkatkan liputan dan kualiti pengangkutan awam di bandar mahupun di luar bandar;

- b. Menanggung sebahagian besar kos persekolahan di sekolah Kerajaan dan kos pengajian di institusi pengajian tinggi awam;
- c. Memberi pelbagai pinjaman dan biasiswa untuk pelajar melanjutkan pelajaran ke institusi pengajian tinggi awam atau swasta;
- d. Meningkatkan perkhidmatan penjagaan kesihatan di hospital dan klinik Kerajaan yang berkualiti kepada rakyat dengan sebahagian besar kos ditanggung oleh Kerajaan;
- e. Meningkatkan bilangan rumah mampu milik;
- f. Menambah baik kriteria penerima Bantuan Sara Hidup (BSH); dan
- g. Skim perlindungan kesihatan MySalam serta Skim Peduli Kesihatan (PeKa B40).

Tuan Yang di-Pertua,

9. Di samping itu, berikutan pandemik Covid-19, Kerajaan turut memperkenalkan langkah-langkah baharu menerusi pakej rangsangan dan pelan pemulihan ekonomi untuk meringankan beban kewangan yang dialami oleh rakyat terutamanya golongan mudah terjejas. Langkah-langkah yang telah diumumkan oleh Kerajaan telah memberi faedah kepada kumpulan pendapatan isi rumah B40 termasuklah moratorium bayaran balik pinjaman oleh institusi perbankan mengikut syarat dan tempoh tertentu, moratorium pinjaman Pendidikan PTPTN, bantuan tunai secara *one-off* iaitu Bantuan PRIHATIN Nasional untuk isi rumah dan individu berumur 21 tahun ke atas pada kadar tertentu serta pemberian diskaun bil elektrik kepada semua pengguna domestik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN TEO NIE CHING [KULAI]

TARIKH : 18 OGOS 2020 (SELASA)

SOALAN

Minta **MENTERI PENDIDIKAN** menyatakan jumlah tawaran dan pengambilan pelajar mengikut kaum dan aliran mata pelajaran untuk seluruh negara bagi pengambilan matrikulasi 2020/2021.

JAWAPAN

Tuan Yang di-Pertua,

Untuk makluman Ahli Yang Berhormat, semasa awal pelaksanaan Program Matrikulasi Kementerian Pendidikan Malaysia (KPM) pada tahun 1999, pengambilan pelajar adalah mengguna pakai prinsip meritokrasi dengan pengambilan 100% pelajar Bumiputera. Namun, pada tahun 2002, Kerajaan telah menetapkan supaya 10% daripada tempat dalam Program Matrikulasi KPM dibuka kepada pelajar bukan bumiputera. Oleh demikian, kuota pengambilan pelajar Program Matrikulasi KPM mulai tahun 2002 ialah 90% untuk pelajar Bumiputera dan 10% untuk pelajar bukan Bumiputera. Kuota pengambilan tersebut masih dikekalkan sehingga kini.

Untuk tahun 2020, jumlah tawaran bagi pengambilan pelajar Program Matrikulasi KPM ialah 30,000 tempat. Daripada jumlah tersebut, 27,000 tempat adalah untuk pelajar Bumiputera dan 3,000 tempat lagi untuk pelajar bukan Bumiputera. Ini adalah berdasarkan kuota pengambilan sedia ada, iaitu 90:10. Khusus bagi nisbah pengagihan kuota 10% pelajar bukan bumiputera, Kerajaan pada 6 Mei 2020 telah memutuskan bahawa peratusan pengambilan pelajar adalah mengikut nisbah 5.43 (Cina):3.72 (India):0.85 (lain-lain).

Secara keseluruhan, jumlah penawaran bagi pengambilan pelajar di Program Matrikulasi KPM tahun 2020 mengikut aliran ialah 24,100 (80.3%) aliran Sains, 1,400 (4.7%) Kejuruteraan dan 4,500 (15%) Perakaunan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. TUAN LARRY SOON @
LARRY SNG WEI SHIEN [JULAU]**

TARIKH : 18 OGOS 2020 (SELASA)

SOALAN

TUAN LARRY SOON@LARRY SNG WEI SHIEN [JULAU] minta **MENTERI KEWANGAN** menyatakan jumlah permohonan keseluruhan dan jumlah individu yang berjaya menerima Bantuan Prihatin Nasional dan jumlah Perusahaan Kecil Sederhana (PKS) yang menerima Geran Khas Prihatin di negeri Sarawak.

JAWAPAN

Tuan Yang di-Pertua,

Secara keseluruhannya, sebanyak 14.07 juta permohonan Bantuan Prihatin Nasional (BPN) telah diterima dari seluruh negara. Daripada jumlah ini, sehingga 31 Julai 2020, sebanyak RM11.14 bilion telah dibayar kepada seramai 10.6 juta penerima.

Bagi negeri Sarawak pula, sehingga 31 Julai 2020, sejumlah RM1.11 bilion BPN telah dibayar kepada seramai 1.02 juta penerima.

Manakala bagi Geran Khas Prihatin (GKP) pula, sebanyak 677,527 permohonan telah diterima dari seluruh negara. Daripada jumlah ini, sebanyak RM1.63 bilion telah dibayar kepada 545,000 PKS mikro.

Bagi negeri Sarawak, sebanyak 31,543 permohonan GKP telah diterima melibatkan RM94.63 juta. Daripada jumlah permohonan ini, sejumlah RM66.22 juta telah dibayar kepada sebanyak 22,073 ribu PKS mikro di Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. TUAN AHMAD FADHLI BIN SHAARI
[PASIR MAS]**

TARIKH : 18 OGOS 2020 (SELASA)

SOALAN

TUAN AHMAD FADHLI BIN SHAARI [PASIR MAS] minta **MENTERI KEWANGAN** menyatakan berapa jumlah aset milik Tabung Haji dan nilainya yang telah dipindahkan kepada Urusharta Jemaah Sdn Bhd (UJSB) dan berapa yang dijual semula atas dakwaan Tabung Haji mengalami defisit aset berbanding liabiliti di bawah program penstrukturan semula aset TH.

JAWAPAN

Tuan Yang Dipertua,

1. Selaras dengan kelulusan Jemaah Menteri pada 7 Disember 2018 dan Parlimen pada 10 Disember 2018 berhubung Pelan Pemulihan Dan Penstrukturan Semula Lembaga Tabung Haji (TH), aset-aset TH yang tidak berdaya saing telah dipindahkan kepada Urusharta Jamaah Sdn Bhd (UJSB) pada 27 Disember 2018. Pada masa ini, kesemua aset yang telah dipindahkan adalah dimiliki sepenuhnya oleh UJSB dan bukan lagi dimiliki oleh TH.
2. Aset-aset TH yang telah dipindahkan kepada UJSB terdiri daripada saham tersenarai (106 ekuiti syarikat tersenarai di Bursa Malaysia termasuk saham keutamaan, waran dan stok pinjaman), saham tidak

tersenarai (1 syarikat perladangan kelapa sawit) dan 29 hartanah (terutamanya kompleks jemaah haji yang kini telah dikomersialkan sebagai hotel). Aset-aset TH yang dipindahkan ini mempunyai nilai pasaran sebanyak RM9.63 bilion sahaja tetapi telah dipindahkan kepada UJSB pada harga RM19.9 bilion melalui terbitan 2 siri sukuk yang akhirnya akan memberikan pulangan sebanyak RM27.56 bilion kepada TH pada penghujung tahun kesepuluh.

3. Selain daripada pulangan yang menguntungkan di atas, TH juga diberikan hak untuk memiliki semula aset-aset tersebut menerusi *Right of First Refusal (ROFR)* yang dipegang oleh mereka. Ini amat penting kerana jika TH mempunyai hasrat untuk mengambil semula aset-aset tertentu berdasarkan strategi pelaburan mereka, TH boleh berbuat demikian melalui ROFR tersebut. Setakat ini, tiada lagi aset UJSB yang dibeli semula oleh TH di bawah ROFR.

Tuan Yang Dipertua,

4. UJSB akan berusaha untuk memastikan aset-aset yang diambil alih daripada TH memberikan pendapatan serta pulangan yang munasabah melalui pengurusan dan proses monetisasi aset yang telus dan menguntungkan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL KETIGA PARLIMEN KEEMPAT
BELAS**

PERTANYAAN : JAWAB LISAN

**DARIPADA : PUAN KASTHURIRAANI A/P PATTO
[BATU KAWAN]**

TARIKH : 18 OGOS 2020 (SELASA)

SOALAN

PUAN KASTHURIRAANI A/P PATTO [BATU KAWAN] minta
**MENTERI PEMBANGUNAN WANITA, KELUARGA DAN
MASYARAKAT** menyatakan :

(a) apakah status Pelan Strategi Kebangsaan Bagi Menangani Punca Perkahwinan Bawah Umur, status jawatankuasa pemandunya dan apakah usaha Kerajaan terhadap 7 negeri yang tidak bersetuju untuk menetapkan 18 sebagai had umur perkahwinan ; dan

(b) bilangan kanak-kanak pengantin lelaki dan perempuan di bawah 18 tahun mengikut pecahan umur di antara pasangan, negeri dan jantina pasangan serta kaum dan agama yang telah berkahwin setakat ini.

JAWAPAN

Tuan Yang di-Pertua,

Kerajaan komited meneruskan usaha bagi menangani punca perkahwinan bawah umur melalui pelaksanaan Pelan Strategi Kebangsaan Bagi Menangani Punca Perkahwinan Bawah Umur 2020 sehingga 2025. Pelan ini mengandungi pelbagai program dan tindakan yang akan dilaksanakan sehingga ke peringkat akar umbi untuk menangani enam faktor yang telah dikenal pasti sebagai punca perkahwinan bawah umur. Program dan tindakan yang dirancang sepanjang tempoh lima tahun pelaksanaan pelan akan mencerminkan isu-isu yang merentas pelbagai sektor seperti perundangan, keibubapaan, sistem sokongan sosial, pendidikan, kesihatan dan kesedaran.

Bagi memastikan pelaksanaan Pelan ini berjalan dengan lancar maka satu Jawatankuasa Pemandu yang dipengerusikan oleh Ketua Setiausaha Kementerian ditubuhkan untuk memantau pelaksanaan pelan serta perkembangan program dan tindakan yang telah dirancang bagi setiap strategi di bawah faktor. Selain itu, Jawatankuasa ini turut berfungsi sebagai platform untuk agensi pelaksana yang terlibat melaporkan pelaksanaan, isu dan cabaran serta cadangan penambahbaikan terhadap setiap program atau tindakan yang dilaksanakan. Jawatankuasa ini juga akan berkuat kuasa dari selama lima tahun sepanjang tempoh pelaksanaan Pelan. Mesyuarat Jawatankuasa Pemandu bilangan 1 bagi tahun 2020 juga dirancang untuk diadakan pada bulan Ogos tahun ini.

Tuan Yang di-Pertua,

Kementerian juga bercadang untuk mengadakan beberapa siri konsultasi di semua negeri mengenai cadangan kenaikan had umur perkahwinan bagi lelaki dan perempuan. Kementerian juga akan meneruskan usaha untuk mengadakan perbincangan bersama UNICEF yang tertangguh disebabkan oleh Perintah Kawalan Pergerakan (PKP). Sesi libat urus juga akan diadakan dengan melibatkan kerjasama pelbagai pihak seperti Kementerian/Jabatan Kerajaan, Ahli Akademik, pakar hak asasi kanak-

kanak, Pertubuhan Bukan Kerajaan (NGO), agamawan serta wakil Kerajaan negeri Sabah dan Sarawak bersama komuniti dari etnik tertentu yang masih mengamalkan perkahwinan bawah umur melalui undang-undang adat.

Kita amat berharap supaya kerjasama dari semua pihak termasuk rakan daripada pihak pembangkang, ahli akademik, NGO dapat diteruskan sebagai rakan strategik bersama Kementerian dalam mengekang perkahwinan bawah umur ini dan seterusnya merealisasikan potensi penuh kanak-kanak di negara ini.

**Jadual 1: Perkahwinan Bawah Umur Mengikut Etnik dan Negeri 2018
yang beragama Islam (Lelaki)**

Kump. Umur \ Negeri	Johor	Kedah	Kelantan	Melaka	N. Sembilan	Pahang	Perak	Perlis	Pulau Pinang	Sabah	Sarawak	Selangor	Terengganu	W.P. K.L.	W.P. Labuan	W.P. Putrajaya	Total
Bumiputera																	
17	11	12	-	4	3	19	15	1	3	28	1	10	13	2	3	-	125
16	3	2	-	1	2	4	5	1	1	7	-	1	4	2	1	-	34
15	-	2	-	-	-	-	1	-	-	4	-	-	-	-	-	-	7
Total	14	16	-	5	5	23	21	2	4	39	1	11	17	4	4	-	166
Cina																	
17	-	-	-	-	-	1	-	-	-	-	-	-	-	-	1	-	2
Total	-	-	-	-	-	1	-	-	-	-	-	-	-	-	1	-	2
India																	
Total	-	-	-	-	-	-	-	-	-	-	-	-	-	-	-	-	-
Lain-lain																	
17	-	-	-	-	-	1	-	-	-	1	-	-	-	-	-	-	2
Total	-	-	-	-	-	1	-	-	-	1	-	-	-	-	-	-	2

**Jadual 2: Perkahwinan Bawah Umur Mengikut Etnik dan Negeri 2018
yang Beragama Islam (Perempuan)**

Kump. Umur \ Negeri	Johor	Kedah	Kelantan	Melaka	N. Sembilan	Pahang	Perak	Perlis	Pulau Pinang	Sabah	Sarawak	Selangor	Terengganu	W.P. K.L.	W.P. Labuan	W.P. Putrajaya	Total
Bumiputra																	
17	92	68	-	20	33	76	83	28	21	156	-	100	77	27	7	-	788
16	45	44	1	9	16	50	31	12	13	78	-	39	38	17	3	-	396
15	11	16	-	4	-	14	10	2	3	19	-	6	12	1	-	-	98
14	3	2	-	-	2	4	3	1	-	7	-	-	6	1	-	-	29
13	-	-	-	-	-	-	1	-	-	-	-	-	-	-	-	-	1
12	-	1	-	-	-	1	-	-	-	-	-	-	-	-	-	-	2
Total	151	131	1	33	51	145	128	43	37	260	-	145	133	46	10	-	1,314
Cina																	
17	-	-	-	-	-	1	1	-	-	1	-	-	-	-	-	-	3
16	-	-	-	-	-	-	-	-	-	1	-	-	-	-	-	-	1
15	-	-	-	-	-	-	-	-	-	1	-	-	-	-	-	-	1
Total	-	-	-	-	-	1	1	-	-	3	-	-	-	-	-	-	5
India																	
17	-	-	-	-	-	-	-	-	-	1	-	-	-	-	-	-	1
16	-	-	-	-	1	-	-	-	-	-	-	1	-	-	-	-	2
Total	-	-	-	-	1	-	-	-	-	1	-	1	-	-	-	-	3
Lain-lain																	
17	2	-	-	1	-	5	-	-	-	21	-	5	4	1	-	-	39
16	-	-	-	-	-	1	-	-	-	7	-	1	-	-	-	-	9
15	-	-	-	-	-	-	-	-	-	2	-	-	-	-	-	-	2
Total	2	-	-	1	-	6	-	-	-	30	-	6	4	1	-	-	50

**Jadual 4: Perkahwinan Bawah Umur Mengikut Etnik dan Negeri 2018
yang Bukan Beragama Islam (Perempuan)**

Kump. Umur \ Negeri	Johor	Kedah	Kelantan	Melaka	N.Sembilan	Pahang	Perak	Perlis	Pulau Pinang	Sabah	Sarawak	Selangor	Terengganu	W.P.K.L.	W.P.Labuan	W.P.Putrajaya	Total
Bumiputra																	
17	1	-	5	-	2	34	10	-	-	6	29	-	-	-	-	-	87
16	1	-	3	1	5	23	7	-	-	-	14	2	-	-	-	-	56
15	-	-	2	-	1	18	2	-	-	-	-	-	-	-	-	-	23
14	-	-	-	-	-	7	-	-	-	-	-	-	-	-	-	-	7
13	-	-	-	-	-	1	-	-	-	-	-	-	-	-	-	-	1
Total	2	-	10	1	8	83	19	-	-	6	43	2	-	-	-	-	174
Cina																	
17	17	-	-	-	2	3	6	-	7	2	8	8	-	5	-	-	58
16	11	-	-	2	4	1	5	-	3	1	3	3	-	1	-	-	34
Total	28	-	-	2	6	4	11	-	10	3	11	11	-	6	-	-	92
India																	
17	2	-	-	3	2	1	2	-	-	-	-	3	-	1	-	-	14
16	-	-	-	-	-	-	1	-	-	-	-	2	-	-	-	-	3
Total	2	-	-	3	2	1	3	-	-	-	-	5	-	1	-	-	17
Lain-lain																	
17	-	1	-	-	1	-	1	2	-	1	-	1	-	1	-	-	8
16	1	-	-	-	-	-	-	-	-	-	-	1	-	-	-	-	2
Total	1	1	-	-	1	-	1	2	-	1	-	2	-	1	-	-	10

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

DARIPADA : Y.B. DR. LEE BOON CHYE [GOPENG]

TARIKH : 18 OGOS 2020 (SELASA)

SOALAN

DR. LEE BOON CHYE [GOPENG] minta **MENTERI KEWANGAN** menyatakan apakah nisbah hutang Kerajaan : KDNK selepas mengambil kira perbelanjaan tambahan pakej rangsangan COVID-19.

JAWAPAN

Tuan Yang Di-Pertua,

1. Sehingga akhir-Jun 2020, hutang Kerajaan Persekutuan telah meningkat kepada RM854.1 bilion atau 57.7% kepada Keluaran Dalam Negeri Kasar (KDNK) berbanding RM793 bilion atau 52.5% KDNK pada akhir-2019. Kedudukan hutang Kerajaan Persekutuan dianggarkan meningkat kepada sekitar 60% kepada KDNK pada akhir 2020, mengambil kira kedudukan defisit dan pelaksanaan pakej rangsangan dan pemulihan ekonomi. Kesemua pinjaman bagi tahun 2020 akan diperoleh daripada sumber domestik. Negara juga mempunyai dana kecairan yang mencukupi dan pelbagai yang disokong pasaran kewangan yang kukuh.

2. Semua langkah yang telah diumumkan dalam Pakej Rangsangan Ekonomi adalah bersifat *one-off* agar tidak akan terus membebankan kewangan Kerajaan Persekutuan dalam jangka masa sederhana dan panjang. Hal ini adalah penting bagi memastikan kedudukan fiskal dan hutang negara kekal pada paras terkawal. Selain itu, Kerajaan akan kembali melaksanakan langkah konsolidasi fiskal dalam jangka masa sederhana bagi mewujudkan ruang fiskal untuk menghadapi krisis luar jangka pada masa hadapan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. PUAN MARIA CHIN BINTI ABDULLAH
[PETALING JAYA]**

TARIKH : 18 OGOS 2020 (SELASA)

SOALAN

PUAN MARIA CHIN BINTI ABDULLAH [PETALING JAYA] minta **MENTERI KEWANGAN** menyatakan untuk menjelaskan sama ada Kerajaan mempunyai perancangan untuk mewajibkan majikan ekonomi gig untuk menyumbang kepada KWSP untuk pekerja mereka. Apakah langkah susulan setelah geran padanan RM50 juta untuk mencarum pekerja habis dibelanjakan.

JAWAPAN

Tuan Yang di-Pertua,

1. Untuk makluman Ahli Yang Berhormat, trend pekerjaan dalam ekonomi gig semakin meningkat terutama dalam kalangan golongan muda dan mereka yang memerlukan fleksibiliti dalam pekerjaan. Mereka yang bekerja di dalam sektor ekonomi gig ada yang terlibat secara sepenuh masa sebagai sumber utama pendapatan dan ada juga yang bekerja secara separuh masa atau sambilan bagi mendapatkan pendapatan sampingan.
2. Kerajaan melihat ekonomi gig sebagai suatu sumber pertumbuhan ekonomi baharu selaras dengan peningkatan bilangan pekerja dan peluang pekerjaan. Menurut laporan Bank Dunia tahun 2019, dianggarkan 26% atau lebih kurang 4 juta daripada tenaga kerja di Malaysia adalah pekerja bebas (freelancer) atau di dalam ekonomi gig. Daripada jumlah tersebut, seramai 2.2 juta pekerja ekonomi gig telah berdaftar di platform Malaysian Digital Economy Corporation (MDEC).
3. Konsep di dalam ekonomi gig adalah permintaan untuk perkhidmatan dan produk oleh individu atau syarikat dipadankan dengan penawaran oleh perkhidmatan dan produk oleh individu yang mempunyai kemahiran dan kemampuan untuk memenuhi permintaan tersebut. Bayaran akan diberikan setelah perkhidmatan atau penghasilan produk dilaksanakan pada kadar yang telah ditetapkan dan dipersetujui oleh kedua-dua pihak.
4. Walau bagaimanapun, disebabkan tiada hubungan yang jelas di antara majikan dan pekerja, golongan dalam ekonomi gig ini tiada perlindungan sosial yang formal dan manfaat pekerjaan seperti yang diperolehi oleh pekerja di dalam sektor formal.
5. Pada ketika ini, golongan yang bekerja sendiri dalam sektor tidak formal dan ekonomi gig boleh mencarum secara sukarela di dalam program i-Saraan KWSP bagi tujuan simpanan persaraan mereka. Selain

mendapat manfaat yang sama seperti ahli KWSP yang lain, ahli i-Saraan di bawah umur 55 tahun layak mendapat insentif khas daripada Kerajaan sebanyak 15 peratus caruman padanan tertakluk kepada jumlah maksimum RM250 setahun.

6. Kadar insentif untuk i-Saraan ini adalah bagi tempoh mulai tahun 2018 hingga 2022. Tambahan geran padanan sebanyak RM50 juta (termasuk untuk caruman PERKESO) yang diumumkan baru-baru ini adalah sebagai galakan tambahan kepada golongan ekonomi gig untuk meningkatkan simpanan persaraan mereka selain sebagai manfaat perlindungan sosial mereka.

7. Perlaksanaan mewajibkan caruman KWSP ke atas golongan yang bekerja di dalam sektor tidak formal seperti golongan ekonomi gig memerlukan kajian terperinci yang progresif dan menyeluruh memandangkan ianya melibatkan proses perundangan. Penglibatan libat urus yang komprehensif dengan semua pemegang taruh dan pihak berkepentingan perlu diadakan mengambilkira faktor sektor ekonomi gig yang sentiasa berkembang dan dinamik.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KEDUA , PENGKAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' ABDULLAH SANI BIN ABDUL
HAMID [KAPAR]**

TARIKH : 18 OGOS 2020 (SELASA)

SOALAN

Minta **MENTERI TENAGA DAN SUMBER ASLI** menyatakan berapa jumlah kawasan hutan simpan dalam negara yang masih ada. Dalam kerancangan pembinaan bandar bandar baharu, apakah jaminan Kementerian dalam menjaga dan mengekalkan hutan-hutan simpan ini.

JAWAPAN

Datuk Yang di-Pertua,

1. Malaysia masih mempunyai kawasan berhutan seluas 18,277,602 hektar atau 55.31% daripada keluasan tanah negara (33,034,500 hektar). Daripada jumlah tersebut, keluasan kawasan Hutan Simpanan Kekal adalah 11,671,853 hektar atau 35.33%.
2. Untuk makluman Ahli-ahli Yang Berhormat, Perkara 74 (2) Perlembagaan Persekutuan telah memperuntukkan bahawa perkara-perkara berkaitan tanah dan hutan adalah di bawah bidang kuasa Kerajaan Negeri. Kuasa eksekutif Kerajaan Persekutuan hanya terhad untuk memberi khidmat nasihat dan bantuan teknikal, latihan serta menjalankan penyelidikan berkaitan perhutanan.
3. Kementerian ini sentiasa komited dalam usaha memelihara khazanah hutan negara dan memastikan komitmen negara untuk mengekalkan sekurang-kurangnya 50% daripada keluasan tanah negara

dilitupi pokok-pokok dan kawasan hutan dicapai. Dalam hubungan ini, antara langkah-langkah yang diambil bagi menjaga dan mengekalkan hutan-hutan simpan ini adalah seperti berikut:

- (i) melaksanakan pindaan ke atas Akta Perhutanan Negara 1984 [Akta 313] bagi memperketatkan proses pewartaan keluar Hutan Simpanan Kekal yang melibatkan proses pendengaran awam (*public hearing*) serta memantapkan penguatkuasaan hutan, meningkatkan kadar denda dan hukuman bagi membendung kesalahan hutan;
- (ii) mempergiatkan usaha ke arahewartakan kawasan-kawasan berhutan sebagai HSK di mana kementerian melalui Jabatan Perhutanan Semenanjung Malaysia (JPSM) mensasarkan untuk meningkatkan jumlah kawasan HSK di Semenanjung Malaysia kepada 5 juta hektar menjelang tahun 2020;
- (iii) meneruskan aktiviti rawatan hutan dan silvikultur dalam Hutan Simpanan Kekal dimana seluas 250 hektar kawasan Hutan Simpanan Kekal telah dikenal pasti untuk tujuan tersebut di bawah Rancangan Malaysia Ke-11. Sehingga Jun 2020, kesemua kawasan tersebut telah melalui aktiviti rawatan hutan dan silvikultur. Manakala, di bawah Rancangan Malaysia Ke-12, seluas 1,640 hektar kawasan Hutan Simpanan Kekal telah dikenal pasti untuk tujuan yang sama;
- (iv) mempertingkatkan usaha pemeliharaan dan pemulihan kawasan hutan melalui Program Restorasi, Tebus Guna dan Pemulihan Kawasan Terosot Di Semenanjung Malaysia. Di bawah Rancangan Malaysia Ke-11, seluas 828 hektar telah di kenal pasti untuk pemeliharaan dan pemulihan. Sehingga Jun 2020, sebanyak 715 hektar telah berjaya dipelihara dan dipulihkan. Manakala, di bawah Rancangan Malaysia Ke-12, kawasan seluas 811.6 hektar telah dikenal pasti untuk tujuan yang sama;

- (v) menyediakan Rancangan Pengurusan Hutan Negeri setiap 10 tahun bagi tujuan pentadbiran, pengurusan dan pembangunan Hutan Simpanan Kekal secara berkekalan;
- (vi) melaksanakan dan meningkatkan aktiviti penguatkuasaan hutan secara bersepadu dengan agensi kerajaan yang berkaitan bagi menangani aktiviti pencerobohan dan kesalahan hutan;
- (vii) menyedia, melaksana dan memantau Catuan Tebangan Tahunan (CTT) setiap tempoh Rancangan Malaysia bagi kawasan hutan pengeluaran dalam HSK;
- (viii) menjana pendapatan melalui potensi baharu selain daripada kayu balak termasuk inisiatif REDD Plus dan bayaran bagi perkhidmatan ekosistem (*Payment for Ecosystem Services – PES*) bagi mengurangkan kebergantungan kepada aktiviti pembalakan;
- (ix) memperkasa amalan pengurusan hutan berkekalan dengan membangun dan mengaplikasikan teknologi terkini dalam penguatkuasaan hutan bagi tujuan pemantauan perubahan kawasan hutan; dan
- (x) menggunakan platform Majlis Tanah Negara (MTN) bagi pelaporan secara berkala berkenaan keadaan semasa HSK di setiap negeri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN SANISVARA NETHAJI RAYER A/L
RAJAJI [JELUTONG]**

TARIKH : 18 OGOS 2020 (SELASA)

SOALAN

Minta **MENTERI TENAGA DAN SUMBER ASLI** menyatakan apakah tindakan yang akan diambil oleh Kerajaan terhadap Tenaga Nasional Berhad untuk menyiasat aduan pengguna elektrik di seluruh negara tentang kenaikan caj bil elektrik yang mendadak.

JAWAPAN

Datuk Yang di-Pertua,

1. Majoriti aduan pengguna elektrik berkenaan bil elektrik tinggi adalah kerana bacaan bil dibuat secara anggaran semasa tempoh Perintah Kawalan Pergerakan (PKP) yang menyebabkan bil elektrik pada bulan Jun kelihatan tinggi kerana penyelarasan dibuat bagi bil anggaran bulan Mac, April dan Mei di dalam bil bulan Jun. Dalam hal ini, Suruhanjaya Tenaga telah mengesahkan bahawa Tenaga Nasional Berhad (TNB) telah mengenakan caj dalam bil elektrik semasa tempoh PKP berdasarkan penggunaan tenaga yang direkodkan melalui meter yang sah dengan mengikut kadar dan struktur tarif seperti mana yang telah ditetapkan oleh Kerajaan.

2. TNB menggunakan kaedah pengiraan secara prorata apabila bacaan sebenar meter melebihi tempoh 31 hari. Melalui kaedah prorata ini, pengiraan penggunaan tenaga (kilowatt jam - kWj) akan mengikut blok-blok tarif yang telah ditetapkan bagi memastikan pengguna dikenakan caj yang tepat dan tiada sebarang caj yang berlebihan dikenakan kepada pengguna. Kaedah pengiraan secara prorata ini telah disemak dan disahkan oleh Suruhanjaya Tenaga sebagai telus dan adil.
3. Justeru, TNB tidak dikenakan sebarang tindakan kerana TNB mematuhi peraturan-peraturan yang sedang berkuat kuasa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. TUAN AKMAL NASRULLAH
BIN MOHD. NASIR [JOHOR BAHRU]**

TARIKH : 18 OGOS 2020 (SELASA)

SOALAN

TUAN AKMAL NASRULLAH BIN MOHD. NASIR [JOHOR BAHRU] minta **MENTERI KEWANGAN** menyatakan langkah yang akan diambil oleh Kerajaan bagi menggantikan kerugian wang RM1.25 bilion berkaitan penyelewengan dana 1MDB seperti dalam kes mahkamah yang melibatkan Riza Aziz memandangkan hanya RM465.3 juta yang dipulangkan.

JAWAPAN

Tuan Yang di-Pertua,

Kerajaan Malaysia dijangka menerima aset luar negara berkaitan 1MDB bernilai USD107.3 juta atau RM465.3 juta hasil daripada persetujuan yang dicapai untuk Riza Shahriz Abdul Aziz dilepas tanpa dibebaskan daripada pertuduhan pengubahan wang haram. Ini adalah antara persetujuan yang dicapai antara pihak pendakwaan dan tertuduh melalui representasi di mahkamah.

Melalui pelepasan bersyarat ini, pihak pendakwaan berhak mendakwa semula tertuduh sekiranya tidak berpuas hati dengan pelaksanaan persetujuan yang dicapai.

Dalam persetujuan ini juga, tertuduh dikehendaki membayar sejumlah kompaun kepada kerajaan mengikut Seksyen 92, Akta Pencegahan Wang Haram, Pencegahan Pembiayaan Keganasan dan Hasil daripada Aktiviti Haram 2001, yang mana ia adalah bersifat punitif sebagai alternatif kepada pertuduhan yang dikenakan ke atasnya.

Tuan Yang Dipertua,

Proses untuk mendapatkan semula dana berkaitan 1MDB sedang berjalan dan ia merupakan suatu proses yang rumit dan panjang yang boleh memakan masa bertahun lamanya. Ini kerana ia bukan sahaja melibatkan kerjasama di antara beberapa agensi tempatan dengan agensi asing daripada pelbagai negara, malahan ia turut melibatkan proses perundangan di mahkamah dan proses rundingan penyelesaian.

Namun demikian, Kerajaan akan meneruskan usaha untuk mendapatkan semula semua dana berkaitan 1MDB yang telah diseleweng sama ada melalui tindakan undang-undang mahupun rundingan penyelesaian dengan matlamat utama untuk memaksimumkan pulangan bagi melunaskan hutang 1MDB mengikut masa yang telah ditetapkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : Y.B. TUAN MUHAMMAD BAKHTIAR
BIN WAN CHIK [BALIK PULAU]**

TARIKH : 18 OGOS 2020 (SELASA)

SOALAN

TUAN MUHAMMAD BAKHTIAR BIN WAN CHIK [BALIK PULAU] minta **MENTERI KEWANGAN** menyatakan langkah kerajaan bagi membantu golongan bekerja sendiri terutamanya di Kawasan luar bandar yang kehilangan pekerjaan atau sumber pendapatan akibat pelaksanaan Perintah Kawalan Pergerakan (PKP) dan penularan COVID-19 di mana mereka tidak dilindungi di bawah Sistem Insurans Pekerjaan (SIP).

JAWAPAN

Tuan Yang di-Pertua,

Pihak Kerajaan sememangnya amat prihatin dengan kesulitan yang dihadapi oleh golongan yang telah kehilangan atau kekurangan pendapatan akibat Perintah Kawalan Pergerakan dan penularan wabak COVID-19, termasuk bagi mereka yang bekerja sendiri di luar bandar dan tidak dilindungi di bawah Sistem Insurans Pekerjaan (SIP).

Pihak Kerajaan telah melancarkan pakej Rangsangan Ekonomi Prihatin Rakyat (PRIHATIN) dan Pelan Jana Semula Ekonomi Negara (PENJANA) berjumlah RM295 bilion yang mempunyai pelbagai inisiatif bagi membantu mereka yang terkesan. Dalam konteks ini, Kerajaan menerusi pakej-pakej rangsangan ekonomi yang diumumkan, telah mengambil pendekatan

secara langsung menangani isu pendapatan terjejas, antaranya seperti berikut:

1. Meringankan beban kewangan yang golongan terjejas pendapatan melalui inisiatif seperti:

- a. Bantuan tunai secara *one-off* dengan nilai diantara RM500 hingga RM1,600 melalui Bantuan Prihatin Nasional;
- b. Moratorium 6 bulan pembayaran balik pinjaman daripada semua bank di Malaysia; dan
- c. Bantuan khidmat nasihat kewangan daripada Agensi Kaunseling dan Pengurusan Kredit (AKPK), Bank Negara Malaysia.

2. Meringankan beban kewangan golongan yang berniaga kecil-kecilan yang terjejas pendapatan melalui insentif seperti:

- a. Bantuan tunai secara *one-off* dengan nilai RM3,000 melalui Geran Khas Prihatin;
- b. Moratorium 6 bulan pembayaran balik pinjaman daripada semua bank di Malaysia;
- c. Pinjaman pada kadar 0% melalui Skim Pembiayaan Kredit Mikro BSN dan TEKUN di bawah PRIHATIN; dan
- d. Mewujudkan peluang kerja bagi kontraktor kecil melalui projek-projek kecil di seluruh negara.

3. Merangsang permintaan pekerjaan di kalangan majikan dan meningkatkan peluang pekerjaan serta kebolehpekerjaan di kalangan pencari kerja tempatan melalui inisiatif berikut:

- a. Program Insentif Pengambilan Pekerja dan Program Latihan (PenjanaKerjaya);

- b. Menaik taraf Portal Perkhidmatan Pekerjaan Negara bagi memperkukuh portal pekerjaan dan padanan kerja serta bekerjasama dengan portal pekerjaan swasta untuk padanan kerja; dan
- c. Program kemahiran dan peningkatan kemahiran.

Selain itu, Kerajaan telah memperkenalkan Program PenjanaGig di bawah PENJANA bertujuan untuk memberi keselamatan sosial kepada Orang Berkerja Sendiri (OKB) yang terlibat dalam pekerjaan ekonomi gig. Melalui program ini, Kerajaan akan menyumbang 70% kepada caruman Skim Keselamatan Sosial Pekerjaan Sendiri (SKSP), PERKESO di bawah pelan 2 iaitu pelan RM232.80 untuk tempoh perlindungan sekurang-kurangnya setahun. Baki, 30% lagi akan dibayar oleh Platform Penyedia Perkhidmatan.

Kementerian Kewangan juga pada masa ini sedang mengkaji keberkesanan inisiatif-inisiatif yang telah diumumkan dan akan memperkenalkan langkah-langkah penambahbaikan segera bagi memastikan golongan sasaran yang terkesan dapat dibantu dengan lebih cekap dan berkesan. Unit Pelaksanaan dan Koordinasi Stimulus Ekonomi Antara Agensi Nasional (LAKSANA) telah ditubuhkan di bawah Kementerian Kewangan dan dipertanggungjawabkan untuk tujuan ini. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 18 OGOS 2020 (SELASA)

SOALAN

Minta **MENTERI PENDIDIKAN** menyatakan status peruntukan sebanyak RM20juta untuk pembinaan bangunan baru Sekolah Jenis Kebangsaan Cina (SJKC) yang telah diluluskan ketika pembentangan Belanjawan 2020 dan kaedah pengagihannya, sama ada SJKC Hillside di Parlimen Rasah akan mendapat sekurang-kurangnya RM1juta.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) tidak menyediakan sebarang peruntukan bagi pembinaan bangunan di sekolah bantuan kerajaan. Kos pembinaan sekolah adalah dibiayai oleh Lembaga Pengelola Sekolah berkenaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KE-14**

PERTANYAAN : LISAN

DARIPADA : Y.B. DR AZMAN BIN ISMAIL [KUALA KEDAH]

TARIKH : 18 OGOS 2020 (SELASA)

SOALAN

DR AZMAN BIN ISMAIL [KUALA KEDAH] minta **MENTERI KEWANGAN** menyatakan kesan penurunan harga minyak ke atas ekonomi negara. Apakah strategi negara untuk menampung kekurangan pendapatan akibat dari turunnya harga minyak.

JAWAPAN

Tuan Yang di-Pertua,

1. Penularan wabak COVID-19 telah menjejaskan permintaan minyak mentah dunia berikutan sekatan perjalanan serta penutupan perniagaan bagi membendung penularan wabak tersebut. Kekurangan permintaan berserta pengeluaran minyak mentah yang tinggi mengakibatkan masalah kekurangan fasiliti penyimpanan minyak mentah dan seterusnya menjejaskan harga minyak mentah Brent sehingga mencatat penurunan ke paras terendah kepada USD17.32 setong pada 21 April 2020. Walau bagaimanapun, pada 27 Julai 2020 harga minyak mentah dunia kembali stabil pada paras USD43.11 setong. Peningkatan harga ini adalah hasil usaha Pertubuhan Negara-negara Pengeksport Petroleum (OPEC) dan Russia yang bersetuju menghadkan pengeluaran bagi menstabilkan harga minyak di pasaran dunia.

2. Semasa pembentangan Belanjawan 2020 pada 11 Oktober 2019, Kerajaan telah mengumumkan unjuran jumlah hasil Kerajaan Persekutuan bagi tahun 2020 sebanyak RM244.5 bilion. Daripada jumlah tersebut, hasil daripada petroleum adalah sebanyak RM50.5 bilion atau 20.6% daripada keseluruhan hasil Kerajaan Persekutuan dengan andaian purata harga minyak mentah dunia Brent USD62 setong. Hasil Kerajaan Persekutuan daripada sumber petroleum antaranya adalah melalui cukai pendapatan petroleum, royalti (bayaran tunai) dan dividen PETRONAS.
3. Walau bagaimanapun, harga minyak mentah dunia Brent telah menunjukkan tren penurunan dan purata harga bagi tempoh Januari hingga 28 Julai 2020 adalah sekitar USD41 setong. Bagi setiap penurunan harga minyak mentah sebanyak USD1 setong, secara purata hasil berkaitan petroleum (tidak termasuk terimaan dividen PETRONAS) dijangka berkurang sebanyak RM300 juta.
4. Sehubungan itu, defisit Kerajaan Persekutuan bagi tahun 2020 dijangka lebih tinggi berbanding anggaran asal dan Kerajaan akan menampung kekurangan pendapatan melalui sumber hasil *one-off* daripada dividen dan bayaran khas oleh Syarikat Berkaitan Kerajaan (GLC), meneroka hasil cukai baharu, penjimatan subsidi minyak dan penstrukturan serta pengagihan semula perbelanjaan Kerajaan Persekutuan.
5. Dari segi ekonomi pula, sektor perlombongan merangkumi 7.1 peratus daripada keluaran dalam negeri kasar (KDNK), 11 peratus daripada jumlah pelaburan dan 6 peratus daripada jumlah keseluruhan eksport negara pada 2019. Penurunan harga minyak mentah dunia telah menjejaskan pendapatan eksport minyak mentah dan gas asli cecair (LNG) sebanyak 25% kepada RM26.9 bilion dalam tempoh enam bulan pertama 2020 berbanding RM35.9 bilion bagi tempoh yang sama tahun lalu. Walau bagaimanapun, kepelbagaian struktur ekonomi serta perdagangan dari segi destinasi dan produk telah membantu mengurangkan kebergantungan kepada sektor komoditi dan meningkatkan daya tahan ekonomi negara.

6. Kerajaan akan terus menumpukan usaha bagi meningkatkan daya tahan ekonomi dengan mempelbagaikan sumber pertumbuhan, meningkatkan daya saing dan memperkukuh kedudukan fiskal negara. Kerajaan juga sentiasa memantau perkembangan global dan melaksanakan langkah-langkah yang sewajarnya dalam memastikan ekonomi negara terus mampan. Kerajaan juga telah bertindak proaktif dengan melaksanakan pelbagai pakej rangsangan ekonomi termasuk pakej Pakej Rangsangan Ekonomi Prihatin Rakyat (PRIHATIN), PRIHATIN PKS+ dan Pelan Jana Semula Ekonomi (PENJANA) bagi meringankan beban ekonomi rakyat, membantu pemilik perniagaan, meningkatkan mutu penyampaian perkhidmatan awam serta memulihkan semula ekonomi negara.

7. Bergerak ke hadapan, Kerajaan sentiasa komited untuk memperteguh asas ekonomi negara, memulihkan keyakinan rakyat dan pelabur termasuk memperkukuh pengurusan fiskal dan mempelbagaikan sumber pendapatan negara demi memacu pertumbuhan ekonomi masa hadapan yang mampan.

Sekian, terima kasih.